

Hibru Firampor Kumwimp Pas

Mekia Akwapnám Kar

Nomo mámá pas kumwinám arop te mér mono. Arop ankwap fárakap te Polo kumwi námponrá ninik napon. Judamp kar te 'Hibru kar'rá sér i konapara, am fárakapan kor 'Hibru arop'rá sénapon.

Am te Jisas pok tenánko, 35 yopwar niamp arake fek mámá pas kumwi nap te, Juda mekamp Kristen ankwap fárakap arop fárakapao sámpá yampourou napo, Kristen yakápnap pwar mwaria napan yaewourrá kumwi napon.

Mámá buk fek sénám te, wourékam kontrak Jisaso yoroí nám te épi kontrakan kámákár akwap námpon. Am te ará: Jisasomp e te ensel fákáreramp eran kámákár akwap námpon. Tá Kraisomp tére te Mosesomp téreran kámákár akwap námpon. Tá Jisasomp pris tére te wokwaekamp pris fákáreamp téreran kámákár akwapria ankár yaká yak námpon. Wokwaekamp pris fákáreramp ofa te nape firan kápae kare por ofa i konapon. Aeno Jisasomp ofa te námokuráp pourouran ofa sánkeanáko, am ofa te ankár arop ponankorampor yaká yak námpon.

Tá mámá buk fek ankwap kar sénám te, Jisasén mér nap am te ankár fwapia kárakáre fek sámp-fákeyakáprá 'Jisasén tokor samp-tukupenk'rá sénámpon.

Kwaromp Tárápao nomwan kar sápnám kar

1 ¹ Kwaro wokwaek kar kápae kare por tá kápae kare nkwakwe make ninik fek nomp appeyaenápen profet fákáreramp top kor feknám kar sánkámpon. ² Aeno oukoumwan mámá ke fek wae pwar naenám yae fek te, Kwaro náráp Tárápamp top kor fek nomwan kar farákáp námpon. Kwar te wokwaek kar Jisasomp yae kor fek apár ntia yámar yoroia pwarará, ankár am Táráp námoku am ankank ponankor sámp naenámpria nánapi pwara námpon. ^a ³ Táráp te Kwaromp wae tokwae ara, nomp pourouk wae tákapa wae nám te, mao ankár Kwar niamp kareno. Maomp kar te kárakáre korara, kápae kare ankank te ponankor ti-fákeyak nánko, am yakápnap puri fek yakáp napon. Mao te arop kápae

^a 1:2 Kl 1:16; 1 Pi 1:10

kareamp kwatae ninik tirá épéria, maomp yiri fek yáráriaka yiki kukarrá kákea pwatea, narek karaoki yaknám King Tokwae Karamp yae-párák mwaek tank námpon.^b

Kwaromp Táráp ensel fákáreran kámákár akwapnám kar

⁴Naropwaro náráp Tárápan sánknám e te kwapwe kateria ensel fákáreramp eran kámákár akwap námpon. Aeria mao námoku tokwae kari yak nánko maok, ensel fákáre te maomp yae ankore mek yakáp napon.^c ⁵Wokwae kar Kwaro námokuráp Buk fek náráp Táráp táman sérrá,

“Amo te onomp Tárápono.

Oukoumwán te ono waráp Naropwar yak nampono.”

Tá warko arakrá sér,

“Ono maomp Naropwar yak nanko,
mao onomp Táráp yak naenámpo.”

Aeno Kwar te ensel ankwapan makeniamp kar sérimp nie? Mo karonó.^d

⁶Mao náráp Táráp ankáránk apárok sámp-kérépámp ke fek te Kwaro arakrá sérimpon:

“Kwaromp ensel fákáre ponankor te
ankár man lotu mwanapono.”^e

⁷Kwaromp Buk fekamp kar ankwapao ensel fákáreramp téreran arakrá sér,

“Mao te náráp ensel fákáreran
ouwi mirink niampi pap konámpono.
Mao te náráp tére aropan
yaomwi yurunknám fupukur pokrá kák konámpono.”^f

⁸Aeno Tárápan te arakrá sér:

“Kwar e! Amo te yaká yak konap kingono.

Amo te koumteouráp aropan
yae-párák kare ninik fek saráp taokeyak konapon.

⁹Amo te kwapwe kare ninikan saráp warákárria maok,
kar ták-pwar konap kwatae ninik te amo
warákár mo kare napon.

Aenapria maok, waráp Kwar námoku
amwan warákár nanap wel kwarákár tenánko,
waráp ankwapyaewarápén kámákarea
narek e tokwaeráp arop niampi yak napon.”^g

¹⁰Tá Kwaro Tárápan warko arakrá sér,

“Tokwae Kar e! Wokwae kar te amo mamá apár yoroia napo

^b 1:3 2 Ko 4:4; Kl 1:15; Hi 8:1-2 ^c 1:4 Fl 2:9 ^d 1:5 Sng 2:7; Hi 5:5 ^e 1:6 Lu 2:13-14
^f 1:7 Sng 104:4 ^g 1:8-9 Sng 45:6-7,10-12; 102:25-27

kárákáre yak námpon.

Tá amoku waráp yae kor fek yámar me yoroiapon.

¹¹ Yámar me ntiaka apár te moyak naenámpon.

Aeno amoku kare te yaká yak nanapon.

Yámar me ntiaka apár te warko ponankor

waempyam épi niamp araknám moyak naenámpon.

¹² Nánkár amo am ankank aropao waempyaman

i konámpnám araknám, yoropwarápia paprá,

arop warko waempyam wourékam sámp konámpnám araknám amo wourékam yoro nanapon.

Aeno amoku te warko tékénou mono,

ankár taki yak nanapon.”

¹³ Wokwaek kar Kwaro Tárápan sérrá,

“Amo te onomp yae-párak mwaek tank napo maok,

nánkár wakmwaek ono amwan yoporap arop te

waráp yae ankore mek párapok tenanampon.”

Aeno Kwar te mae ke fek ensel ankwapan make pourouráp kar sérino?

Ankár mo karonó.^h ¹⁴ Ensel te wunéri mwarria Kwaromp tére konapono.

Kwar warko érékép naerianám arop fárákapan yaewouranáponoria am ensel fákáreran tirá kérép konámpono.ⁱ

**‘Kwaro nomwan warko érékép nám te tokwae
kar ankankono’rá sénám kar**

2 ¹ Jisaso Kwaromp ninik farákáprá sénámpara, nomo oukoumwan am kar wawia méria am karaok paokop mwanámpon. Nomo fwapia wa moitea ankwap ankankan ninikria poporokwenáprá panek tukup mwareano. ² Wokwaek kar Kwaro nomp appeyaenápén enselomp top kor feknám kar sánkám te, am kar oukoumwan kárákáre yak námpon. Aenámpan maok, arop ponankor am kar ták-sirarea, am fek touwe kwatae sámpapono. ³ Aeno oukoumwan Kwaro nomwan warko érékép naeria tére nám te tokwae kar ankankono. Aenámpara, nomo am Kwaromp térean younkwe mwaek sirarea paokop nám te, nomo te mokopia Kwaromp yonkwae pwarám wouroukoup mwanámpon? Tak mwanám pourou mo karonó. Manénkir te Tokwae Karao námoku nomwan warko érékép naeria, kar farákáp námpon. Tá maomp kar wawinap arop fárákapao nomwan arakrá sér, “Mámá kar te waeman kare karonó.”^j ⁴ Kwaro náráp Tárápamp kar am te kare karonoria yénkép nám te ará: Koumteouráp aropan nkwakwe make kárákáre yororo, tá Yiki Kor Spiritamp ourour námoku niniknám puri fek yénkimpon.^k

^h 1:13 Sng 110:1 ⁱ 1:14 Sng 91:11; Ap 12:7 ^j 2:2-3 Hi 12:25 ^k 2:4 Mk 16:20

**‘Jisas te nomwan warko éréképnámp arop
ankárank támaono’rá sénámp kar**

⁵Nomo wourékam apár Kwaro wakmwaek yoro naenámpria ninik námp kwamp te, nomo wae mér, Kwar te ensel fákáreran am apár taokeyakáp mwanapria pap mono. ⁶Wokwaek kar arop ankárankampao Kwaromp Buk fek arakrá sérimpon:

“Arop yino te apae ankankanánko, amo yinan ninik i konapon?
Yino te kánanke kwatae te,
apaeritea amo yinan yae-párák kare taokeyak konapon?”

⁷Amo yinan yoroi nap te,
fae tákáre ke fek saráp
ensel fákáreamp yae ankore mek
kák nanampria niapon.

Aeno wakmwaek amo yinan narek paprá,
kárákáre sáприя, e tokwae sáп napon.

⁸Amo te yinan amo yoroinap ponankor ankank
taokeyakáp mwanapria nánapi pwara napon.”

Mámá kar ‘Kwaro kápae kare ankank aropamp yae ankore mek kák tenámp’rá sénámp te, nomwan arakrá yéńkép námpon: Mao te ankwap ankárankamp ankank maomp yae ankore mek yak mo, kwaporok yakanoria pwar mono. Aeno ponankor ankank maomp yae ankore mek yak námp te nomo oukoumwan nke mo námpon. ⁹Aeno nomo te Jisas e tokwae sámp námp wae nke námpon. Mao ankank kápae kare taokeyak námpon. Manéńkir mao apárok ékia yakámp fek te, fae tákáre ke fek enselomp yae ankore mek yakámp te, Kwaromp aropomp yéńképria, ponankor koumteouráp aropan ér-pwarará, sumpwi nanampria ninámpon. Am touwe sámpea sumpwi námp fek táman Kwaro man narek papria, kárákáre tokwae ntia e tokwae sánk námpon.^l

¹⁰Kwar te mao támao námoku yoroinámp ponankor ankank fi korara, maomp ninik te náráp tárápu yámar mek éréképá pokeanáńko, yae-párák kare yakáp mwanaprianámpon. Kwaromp ninik te Jisas numwar touwe sámpeanáńko, am touwe sámp námp támao, koumteouráp aropan warko éréképnámp kwapwe kare kare arop yakanorianámpon. Am Kwaro takimp ninik te yae-párák kare ninikono.^m ¹¹Nomo te wae mér námpon: Ponankor koumteouráp aropan yiki kukarrá pap konámp arop, ntia am yiki kukur kare yakápnap arop te méńtér ankárankamp Naropwaromp tárápunono. Aenapantá maok, Jisas te pwarápaе mono, ankár ‘Onomp nánaeou’rá sénámpon.ⁿ ¹²Kwaromp Buk fek yaknámp kar te ará:

“Ono onomp nánaeou fákáre koupoukour napo,

^l 2:9 Fl 2:8-9 ^m 2:10 Hi 5:8-9 ⁿ 2:11 Mk 3:35

am ou mek 'Amo te arak i konapono'rá farákápriaka waráp e sakap nanampon."^o

¹³ Kwaromp Buk fek sénámp kar ankwap te ará:

"Amo 'Nanamp'rá séri nap táman fwap tak nae raponria mér nanampon."

Tá warko sérrá,

"Ono te Kwaro onan ti-sápnámp tárápunt máyak nampon."^p

Jisas nomwan yaewour nanampria arop arákarámp kar

¹⁴ Am tárápu Jisaso sénámp te koumteouráp arop fárákap táman námpon. Aenámpara, Jisas kor arop arákarea, am fárákap niampimp te, mao fwap sumpwiaka koumteouráp aropan surumpwirá kák konámp kárákáre tokwaeráp Satanén kwatae pap nanampria nimpon.^q

¹⁵ Koumteouráp arop sumpwiantá apáp tirink nap te, kápae kare por mamá apár mek yakáp napo, am fárákapamp apáp támao nánko, Satanomp fákapá kák tenámp mek yakápiapon. Aeapan maok, Jisas sumpwimp te am fákapá yakápnamp mekamp érékép naeria nimpon.

¹⁶ Karenono, mao wokwaek téremp te ensel fákáreran yaewour naeria tére mono. Mao sumpwi námp te Abrahamomp appeyaenápén yaewour naeria nimpon. ¹⁷Náráp nánaeounáp fákáre nomwan yaewour naeria námpara, ankár arop nomo niamp make kare yakria maok, Pris Tokwae yakriaka Kwaromp tére námpon. Takria maok, arop aropomprá, tá ankár yae-párák kare tére nánko maok, koumteouráp aropamp kwatae ninik tirá épér naenámpon. ¹⁸Mao námoku Satano poupwekápnámp touwe sámprá kwe-pwarari námpara, fwap aropan kor Satano poupwekápnámp nánko, sámprá touwe fwap yaewour naerámpon.^r

Jisasomp kárákárerano Mosesomp kárákáre kwe-pwarnámp kar

3 ¹Kristen ankwapyae fákáre, Kwaro yámar mek yakria yumwan kor wumwiri námpon. Aenámpara, yumo fwapnae karia Jisasén ninik kour kip. Mao te aposel, Pris Tokwae Karara, nomo man méria maomp e érik sér i konámpon.^s ²Kwaro man mamá tére sánkeanánko, Kwaromp karwaok kar námp te, wokwaek Mosesén kar sánkánko, mao koumteouráp arop ou mek Kwaromp nap niampi yakria, téremp niamp wuri popwar námpon. ³Aeno nomo te wae mér námpon: Nap tinámp aropamp e te tokwae karria, napamp eran kámákár akwap námpon. Taknámp Kwaro Jisasén sánknámp e tokwae te Mosesomp e tokwaeran kámákár akwap námpon. ⁴Ponankor ankákárak nap te

^o 2:12 Sng 22:22 ^p 2:13 Ais 8:17-18 ^q 2:14 1 Jo 3:8 ^r 2:17-18 Mt 4:1-11; Hi 4:15

^s 3:1 Hi 4:14

waeman aropao tére napon. Aeno Kwaro námoku maok ankank ponankor yoroimpon. ⁵ Moses te Kwaromp tére arop niamp, mao ankár Kwaromp karwaokria Kwaromp nap mek térempon. Aeria Kwaromp arop fákáreran Kwaro wakmwaek sénaenámp karan farákápámp. ⁶ Aeno Kraiss te Kwaromp Tárápara, Kwaromp karwaok yae-párak kare téreria Kwaromp koumteouráp arop maomp nap mek yakáp napan taokeyak námpon. Táte nomo kápae kare por man kárakáre fek méria warákárria Kwar Tokwaeran yépékrá yakáp námp te, nomo kuri Kwaromp nap niampi yakáp námpon.^u

'Anepér sámp mono'rá sénámp kar

⁷Nomo te Kwaromp koumteouráp arop fi yakáp námpara, arop Kwaromp Buk fek Yiki Kor Spiritao ninik sánk nánko, kumwinámp kar man nomo fwapia wa mwaro:

“Yumo oukoumwan Kwaromp Kar wa nap kwamp te,

⁸ yumo te wokwaek yakápap

Israel arop fárakapaoiápnámp araknámp

yiráp ninik fákapea kárakáre kwaponó.

Kwaro sérrá,

‘Am fárakap te arop yak moap apárok yakápria

onan mokopon nke mwarria onomp kar ták-siriapon.’

⁹ Am apár mek yiráp appeyaenápo kor 40 yopwar fek

ono kápae kare ankank téleriaka

am fárakapan yaewouranko nkeapao maok,

Kwaro nomwan yopor te mokoepan nke mwar ritea

sokororá paokopiapon.

¹⁰ Aeapantá maok,

ono ankár am koumteouráp aropan te

yopor yonkwae pwarámpa waeria maok, sérrá,

‘Ankár ono sénampaok pwarará

onomp ninikaok paokop mo napantá,

¹¹ Ono yopor yonkwae pwarámpa waeria maok,

am fárakapan arakrá sénampon:

Kare kar narekampráp yumo te

onomp anepér mwanap némpouk te tukup mo karenono!’ ”^w

Nomo kor Israel fákáreaoi napnámp taknámp kar ták-sir mwareano

¹² Kémpiyae tárápu, yumo te fwapia mér kip: Takria yumo ou mekamp ankárankao maomp ninik mek kwatae ninik yak nánko sámpria, yiki

^t 3:2,5 Nam 12:7 ^u 3:6 Hi 3:14; 10:23 ^v 3:7-8 Kis 17:7; Nam 20:2-5

^w 3:11 Nam 14:21-23

yak konámp Kwarén younkwe sirarea Kwarén mérnámp ninik pwar naeane. ¹³‘Oukoumwan’ yak nánko, nomo kor ‘Oukoumwan’rá sér i konámp kumur méntép yumo ankár nonopok yaewourria kárákáre nénk kipo. Takria, yumo ou mekamp ankwap ankárankampan kwatae ninikao man poupwékáp nánko, maomp ninik kárákáre nánko, Kwarén mér mo naeane. ¹⁴Nomo wokwaek kar méri námp te ankár oukoumwan kor am mér te kárákáre fek sámpea yakáprá tukupea sumpwinámp ke fek mwanámpon. Nomo takria te, nomo ankár Jisasomp koumteouráp arop kare yakáp námpon.^x

¹⁵Ono manénkir sérinamp kar táman warko Kwaromp Buk fek arakrá sénámpon:

“Yumo oukoumwan Kwaromp kar wa nap kwamp te,
yumo te wokwaek yakápap
Israel arop fárákapaoiápnámp araknámp
yiráp ninik fákapea kárákáre kwaponu.”^y

¹⁶Wokwaek kar te apae arop firao Kwaromp kar wa napao, am kar ták-sirariapon? Am te Moseso Isip mekampan éréképea akwapámp arop ponankor támao takiapon. ¹⁷Kwaro 40 yopwar fek yopor yonkwae pwarámp rá akwapámp te wanimpon? Am yopor yonkwae pwarámpámp te kwatae ninik fek yakápap koumteouráp aropan nánko, am fárákapao faokorapo, maomp yákáre te kwar mwar mek tankápámp te, Kwaro am fárákapapan saráp yopor yonkwae pwarámpámpon. ¹⁸Kwar te wan ‘Onomp anepér mwanap némpouk tukup mwanap pourou mono’ ria fou e séri námpon? Am Kwaromp kar ták-pwarnap koumteouráp arop fi támanimpon.^z ¹⁹Aenámp te nomo wae mérono: Am fárákap te Kwarén mér mo kare napara, am fi kor fek táman Kwaromp anepér mwanap némpouk te ankár kare kar yink mo karenono.

Kwaromp koumteouráp arop anepér sámpon mwanap kar

4 ¹Kwaro ‘Yumo te ono yaknamp anepér mwanap némpouk korop mwanap’ rinámp kar te oukoumwan máyak námpon. Aenámpara, nomo ankár apáp mwanámpon. Takria Kwaro nke nánko, yumo ou mekamp arop am mek akwap moantáno. ²Nomo wawinámp Kwapwe Kare Kar máte, wokwaek Israel firao wawiap niampon. Aeapan maok, am fárákap te wa mwar waria maok, Kwaromp kar te karenoria mér moiapon. Aeapara, am fárákapao wanap Kwapwe Kare Kar te man yaewour moimpon. ³Oukoumwan te Kwarén mérnámp arop nomo te fwap am anepér mwanap némpouk tukup mwanámpon. Wokwaek Kwaro am némp táman námwan mér monap aropan sérrá,

“Ono yopor yonkwae pwarámpria fou e sénampono:

^x 3:14 Hi 3:6 ^y 3:15 Sng 95:7-8 ^z 3:18 Nam 14:1-3,26-33

Ono yaknamp anepér mwanap némpouk korop mo karenono.”
 Am takrá sénámp te, námokuráp anepéran sénámpan maok, mao máma apár yoroia pwarará te, warko tére naenámp yak moimpon.^a ⁴Kwaromp Buk fekamp kar ankwap ‘Fákánek yae’rá sénámp te, Kwaro am fákánek yae fek mao térea pwara námp nkea am yae fek anepérimpon.^b

⁵Am kar manénkir nomo nke námp te arakrá sénámpon:

“Am fákáre te ono yaknamp anepér mwanap némpouk te ankár yink mo karenono.”

⁶Ankwap fárákap te fwap maomp anepér i konap némpouk yink mwanapon. Aeno koumteouráp arop ankwap fárákap wokwaek Kwaromp Kwapwe Kare Kar wawiapao ták-siri nap te, am fárákap te am némpouk tukup mo karenono. ⁷Am fárákap sokororá paokopria kwar saráp mek faokor tenapo, kápae kare yopwar akwapeanánko maok, Kwaro King Devitén yink mwanap yae ankwap ‘Oukoumwan’rá sénámp kar farákápámp te nomo wae sérinámp niamp támaono:

“Oukoumwan yumo Kwaro sénámp kar máma wa nap kwamp te, yiráp ninik fákapea kárákáre kwapono.”^c

⁸Wokwaek kar Josua am arop fárákapan am apár mek anepér sánkearánko te, Kwaro Devitén warko wakmwaek yae ankwaprá sér mono. ⁹Aempara nomo te wae mér námpon: Nomo anepér mwanámp te oukoumwan yak námpon. Am te Kwaro fákánek yae fek anepérimpon niamp. ¹⁰Nomo wae mér námpon: Arop Kwarént maomp anepér i konámp némpouk yoump námp te wokwaek Kwaro náráp tére pwarará anepérimpnámp taknámp, mao kuri náráp tére pwarará anepérampon.^d ¹¹Nomo ankár am anepér i konap némpouk tukup mwaria te, ankár tére kárákáre mwanámpon. Takria arop ankwap ankárank wokwaekiapnámp taknámp kar ták-sir konap ninikaokria am mek yoump mo naeane.

¹²Kwaromp kar te yiki yak námpara, tére kárákárerá yak námpon. Am te énénkér mwaek wiráp bainat wiran kámákár akwap námpon. Am Kwaromp kar te aropan faropea mek karaok akwap konámpon. Aenánko maok, waemp ntia ninik mek kukkwaraoikia yae ke me mwaek, pu kwaráp kor me mwaek worépámprá akwap konámpon. Aenánko maok, nomo nomp ninik mekamp ankank ponankor mér i konámpon.^e

¹³Kwaro nke námp fek te, námoku yoroinámp ankank te ankwap ankank ankárank mek yak mo karenono. Ponankor ankank te Kwaro nke námp fek érik karaok yak námpon. Kwaro saráp nomp ninik ponankor yurukup naenámpon.^f

^a 4:3 Sng 95:11 ^b 4:4 Stt 2:2 ^c 4:7 Sng 95:7-8 ^d 4:10 Stt 2:2 ^e 4:12 Ef 6:17; 1 Pi 1:23; Yé 2:12 ^f 4:13 Ro 14:12

‘Jisas te nomp Pris Tokwae’rá sénámp kar

¹⁴Nomo te wae nomp Pris Tokwae mao yakria yámar mek mek karaok Kwaromp wonae fik youmpá yak námpon. Mao te Jisas, Kwaromp Tárápono. Nomo Jisasén mér námamp farákáprá sér i konámp te ankár kárákáre fek sámpea paokop mwanámpon.^s ¹⁵Nomoku mwar te kwatae ninik kwe-pwar mwanámamp kárákáre te mo námpara, am nomp Pris Tokwae támao fwap nomwan aropomp naenámpon. Am te apaeritea námpanápe, nomwan ponankor nkwakwe make ninik korop námamp te, man kuri wae tak námpan maok, mao te kwatae ninik moimpon.^h ¹⁶Aenámpara, nomo fwap Kwaromp wonae fik tukupria apáp mo, fwapon. Am arop te aropomp i konámpara, nomo maonámpok tukupria te, mao nomwan yonkwae touwe námamp nke mwanámpon. Tá nomo apae ankankan ninik tokwae nánko te, mao nomwan námokuráp ninik fek yaewour naerámpon.ⁱ

Pris Tokwae Jisas nomwan warko érékép naenámamp pwinámamp kar

5 ¹Ponankor pris taokeyakáp mwanap arop yoroi pap konap ninik te ará: Kwaro arop ankáránk warámpea, man maomp téreria kourteouráp aropan yaewour naenámamp arop yoroi pap konámpono. Pris taokeyak konámamp aropamp tére te nkwakwe make ankank Kwarén kwaporok nénk, ta kwatae ninik tirá épér naenámamp nkwakwe make ofa nénk konámpono. ²Am arop námoku kwatae ninikráp aropria kárákáre yak mo námpara, mao te arop fárákap mér moráp, tá Kwaromp mwae kup pwarnap arop fárákapán sánánkar porokwe fek yaewour naenámpon.^j ³Tá am arop námoku támao porokwe námpara, mao kourteouráp aropamp kwatae ninikan Kwarén ofa sánkria maok, námokurápan kor mént sánk naenámpon.^k

⁴Am pris taokeyak konámamp arop te e tokwaerápara, arop ankáránkao námokuráp ninik fek am tére mono. Kwaro wokwaek Aronén wumwiria am tére sánkámpnámamp taknámamp wumwiria sánk nánko maok, am tére sámp konámpon.^l

⁵Kraiso kor take. Mao námokuráp eran narek papria pris taokeyak konámamp arop yak mono. Kwaro námoku man am téreaeria pap námpon. Kwar te arop ankwapan sér mono, man saráp arakrá sér,

“Amo te onomp Tárápono.

Oukoumwan ono te waráp Naropwar yak nampon.”^m

⁶Ankwap fek kuri Kwaro sérrá,

“Amo te ankár Melkisedeko yakámpnámamp taknámamp

^s 4:14 Hi 10:23 ^h 4:15 Hi 2:17 ⁱ 4:16 Hi 10:19 ^j 5:2 Hi 4:15 ^k 5:3 Wkp 16:6,24

^l 5:4 Lo 28:1 ^m 5:5 Sng 2:7; Hi 1:5

pris yaká yak nanapon.”ⁿ

⁷Wokwaek kar Jisas apárok arop yakámp fek, mao Kwarén kar toropwapámp fek te, mao námwan warko warámp nángo, sumpwi mo nanampaoeanria méria, Kwarén kárakáre fek kar toropwapria tékén wumwirá éma waempon. Mao te námokuráp ninik wampwe pwarará, Kwaromp yae ankore mek yak námpara, Kwaro maomp kar wawimpon.^o

⁸Jisas te Kwaromp Tárápao maok, mao touwe sámpámp te, am ninik támao Kwaromp karwaok tukup konap yénkép námpon. ⁹⁻¹⁰Amnámp támao, ankár Kwaromp karwaok naenámp arop ankárankamp kare yak námpon. Aenámpantá maok, Kwaro man sérrá, “Amo te Pris Tokwae Melkisedek yakámpnámp taknámp yak nanapon.” Aerá sérianánko, mao te náráp karwaoknap koumteouráp aropan warko éréképeanánko, yae-párák yakápi-yakáp mwanap arop yak naenámpon.

Nomo te épér morok táráp kánanke niampi yakáp mwareano

¹¹Jisas ntia Melkisedekomp kar kápae kare yak námpan maok, yino yumwan sér mwarianámpao, yiráp ninik épérép napantá yino mámá kar fi yumwan yénkép mwanámp pourou mo námpon. ¹²Kápae kare ke akwap tenánko, yumo fwap wae tisa yakáp mwanapan maok, mo napon. Yiráp ninik te oukoumwan sik napara, yumwan arop ankwapao Kwaromp kar wourékam Kristenén farákáp konap niamp fek warko farákáp mwanap námpon. Yumo te oukoumwan kárakáre fir fár mwanap pourou mo napara, moman saráp fánapon.^p ¹³Nomo te waeman mér námpon: Kápae kare arop mom mwar fánap te oukoumwan épérmou tárápu niampi yakáp napara, yae-párák kare ninik, tá kwatae ninik fwapia mér mo napon. ¹⁴Aeno kárakáre fir te arop wae méri yakáp napao fári konapon. Am taknap arop farákap te waeman námoku ninik kour sámpea nkwakwe make tére mwanap ninik mek kákrá, kwataenámp ninik mér, kwapwe kare ninik mér i konapon.^q

Nomo Kwarén mér námp fwapia kárakáre fek sámpea paokop mwanámp kar

6 ¹⁻²Nomo te Kraisomp manmékir wawimp kar kánanke táman saráp sérar mwareano. Nomo te oumpwaran kápae kare por yimp saráp yakáp konap niamp mwareano. Nomwan yiki yak mo i konámp wokwaekamp ninik te ankár younkwek pwararea maok, Kwarén mér i konap ninik, tá nkwakwe make ént mek nérrá kák konap kar, tá arop ént mek nérrá pourouk yae pap konap ninik, tá sumpwianámp arop warko fárámp naenámp kar, tá kwatae ninik fek yakápnap arop farákap kotiaka fákapea yaká yakáp mwanap kar, ará kar táman saráp farákáp

ⁿ 5:6 Sng 110:4; Hi 7:1,16-17 ^o 5:7 Lu 22:40-44 ^p 5:12 1 Ko 3:1-3 ^q 5:14 Ro 16:19

mwareano. Oukoumwan te nomo ankár Jisasén mér kareria am kar te kámá-pwarará mér kárákárean farákáp konap kar fek farákáprá tukup mwanámpon. ³Kwaro nomwan am takenkrianánko te, am te pwararea maok, nomo ankár Jisasomp kárákáre kor kar farákáp mwanámpon.

⁴'Arop ankwap farákáp te waeman Kwaromp wae kwapwe sámpría, tá yámar meknám koropnám kwaporok sánknám fir niamp sám, tá wae Yiki Kor Spirit sám napara, am arop farákáp warko Kwarén younkwe sánk nap te, warko Kwaronámpok koropria kwatae ninik younkwek sir mwanap mwae kup yak mo kareno. ⁵Am farákapao Kwaromp kar te kwapwe karenoria wae mér napon. Aeria Kwaro arop ponankor nánkárap taokeyak naenám kárákáre tokwae kwapweran wae mér napao maok, ⁶Kwarén mér nap pwarará kwatae ninik fek tukup nap te, warko kwatae ninik pwarará, Kwaronámpok arákarrá korop mwanap mwae te yak mono. Am farákapao taknap ninik te Kwaromp Tárápan warko yaopwae porokopramp fek pukup napo, arop ankwap farákapao man nkea wouroump nap niamp napon.'

⁷Kápaé kare por warákam ék saráp yak nánko, apár porokwe kwapwe nánko maok, am apár mek aropao yopwar yororia fir yoro napo, kápaé kare tankápria maok, arop yaewour i konámpon. Am tak nám te, Kwaro am apáran kárákáre sánk nánko námpon. ⁸Aeno nkwakwe make paok wi, tá fok kápaé forokornám apár te Kwaro nke nám fek am apár te kwatae námpara, yae amp mono, Kwaro sénánko, koupour kar yaomwirao fánaenámpon.

⁹Kémpiyae tárápu kare, oukoumwan yino yumwan má kárákáre kor kar sénámpan maok, yino te waeman mér námpon: Yumo te take pourouráp sám mono, kwapwe kare mwaeao tukup napo, fwap Kwaro yumwan yaewouria warko érékép naenámpon. ¹⁰Kwar te kwataenám aropao yumo térenap tére kwapwe ník mo, pwar naenámpanápe? Yumo waeman Kwarén warákár napara, am ninik táman maomp koumteouráp aropan yaewour mwanap ninik sánk námpon. Aenánko yumo te ankár takrá yakáp i konapon.^s ¹¹Yinomp ninik te, yumo ponankor ankár kárákáre fek takrá térerá tukupria maok, Kwaro yumwan warko éréképea fwapokwap naenám ke yépék nap, mér kárákáre fek sám-fákeyakápenkria námpon.^t ¹²Yumo kokwae kwapono. Yumo ankár arop farákapao wokwae Kwaro 'Náráp tárápuan nénk nanamp'rá sérinám ankank sám mwanámpría méria yépékria koupour kokwae moi nap niamp kipo.

Nomo Kwaro sérinám kar táman mér kárákáre mwanám kar

¹³Wokwae kar Kwaro Abrahamén 'Wakmwae ankank sánk nanamp' ria sérimp kar te, arop ankwap tokwae kar Kwarén kámákár

^r 6:4-6 Hi 10:26-29 ^s 6:10 Hi 10:34; 1 Ko 15:58 ^t 6:11 Hi 3:14

akwap námp te yak nánko, Kwaro maomp e fek fou e sénaenámp te mo námpantá, Kwaro námokuráp e fek fou e sérimpon. ¹⁴Aeria maok sérrá, “Ono waeman amwan kárákáre kor kare kar sér rae: Ono ourour kwapwe kare sánk tenanko, nánkár waráp appeyaenáp fekamp kápae kare arop forokor naenámpon.”^u ¹⁵Aerámpantá maok, Abrahamo kuri táman wawi pwatea koupour kokwae mono, am yae táman yépékrá akwapea Kwaro wakmwae kénék nanamprim ankank ponankor sámpámpon.

¹⁶Fou e sér i konap ninik te ará: Arop ankárank wa mokop tokwaean nkea maomp e fek fou e sénapo, am támao am aropamp e te tokwae karia ankwap fárákapan kámákár akwap námp yéncép konámpon. Am támao mao sénámp kar kárákáre sánk nánko, ankwap fárákap wawia ‘Kare námpono’rá sér i konapon. ¹⁷Wokwae kare Kwaro maomp tárápuan yaewour nanampria sérimp kar te am ke fek érik karaok yéncép naeria, mao kar mwar séria pwar mo i konámpara, náráp kar kare karonoria fou e sérimpon. ¹⁸Aemp te oukoumwan kor Kwaro ‘Yaewour nanamp’ ria sérimp kar, tá fou e sérimp kar makia má anánk kar oukoumwan yak námpon. Kwar te am ankank anánkaopwe te kwekária pwar mono. Nomo pírikimpá koropea Kwaromp wonae fik yakáp námpara, am kar anánkaopwe támao nomp ninik mek kárákáre sáp nánko, nomp ninik te Kwaro sérimp ankank máte, fwap sámp mwanámponoria kárákáre fek yépékrá yakáp námpon.’ ¹⁹Am Kwaro sérinámp ankankantá yépék námp te paok perao yao yowe fek térea kárákáre yak konámpnám taknámp nomp ninik mek taki yak námpon. Am paok pe te Kwaromp Nap Aokore Yiki Kor Kwapwe Kare mek tokorop tenap, waempyam éntér mek youmpá térea kárákáre yak námpon. ²⁰Jisasomékir nomwan yaewour nanampria am aokore mek youmpea Pris Tokwae Melkisedek yakámpnám taknámpia ankár yaká yak námpon.”

Melkisedeko pris tokwae téremp kar

7 ¹Am Melkisedek te taun Salem mekamp king, tá Narek Karaok Yaknámp Kwaromp priono. Wokwae Abrahamo king fákáreran yorowarrá yáakria yéncépa pwatea koropánko maok, Melkisedeko mwaeak kikipria maok, man ourour sánkámpon. ²Aenko maok, Abrahamo ankank ponankor fére-sámpramp fi kákea pwateyará Melkisedekén ankwap fi sánkámpon. Am ‘Melkisedek’rá sénap e fi te “Yae-párák Kare Ninik i konámp Kingono.” Mao te taun Salem mekamp kingono. Am takrá sénap te ‘Yonkwae Porokweráp Ninikamp Kingono’rá sénapon.”^x ³Maomp éntupwar naropwaromp e te buk fek yak mo, tá maomp appeyaenáp fi e yak mo, tá éntupwaro man sámpámp yae arop

^u 6:13-14 Stt 22:16-17 ^v 6:18 Nam 23:19 ^w 6:19-20 Wkp 16:2; Hi 9:3

^x 7:1-2 Stt 14:17-20

mér mo, tá mao sumpwimp yaerao kor buk fek yak mono. Mao te ankár Kwaromp Táráp niampia pris yaká yakámpon.^y

⁴Yumo te ankár Melkisedekomp e tokwae táman ninikenke. Mao te kárákáre tokwaeráp arop, tá nomp appe fi kare Abrahamo yorowarrá yarakria kokwapwe kare ankank tirá yarakimp fére-sámpramp fi kákea maok, fére má Melkisedekén sánkámpon. ⁵Livai firao saráp pris tére konapon. Aenapo maok, loao arakrá sér, “Ankwap Israel fi te ankank fére-sámpramp fi kákea, fére te Livai firan nénkenke.” Israel fi te Livai firént mwearoria am fárákapao kuri Abrahamomp tárápu napao maok, am fére-sámpramp fi kákeanap ankank fére fek yak námp te am fárákapan nénkapon.^z ⁶Melkisedek te Livai fi mekamp moan maok, Abrahamo ankank fére fek yak námp am man sánkámpon. Melkisedek te Kwaro ‘Warko sánk nanamp’rá sérinámp arop táman ourour sánkámpon. ⁷Nomo te wae mér námp: Arop ankwapan ourour sánknámp arop te mao te arop tokwaenono. Aeno am ourour sámpnámp arop te maomp yae ankore mek yak námp. ⁸Livai firao am Israel firao nénknap ankank fére-sámpramp fi kákea nap ti nap te sumpwi mwanap apono. Aeno am arop Melkisedeko Abrahamoinámp ankárakamp fi ankank sámpámp te Kwaromp Buk fek te, ‘Mao te oukoumwan yiki yak námp’rá sénámpon. ⁹Tá nomo fwap arakrá sér, ‘Kare, Livai kor am fére fek yaknámp ankank sámp konámpan maok, wokwaek Melkisedeko Abrahamoinámp ankank sámpámp te Livai firaoi napan sámp námp támaono. ¹⁰Livaimp éntupwar man oukoumwan fárákap mo, mao te Abrahamomp pourou mek yakánko, Melkisedekén am ankank sánkámpon.

Pris wourékam wokwaekamp prisan kwe-pwarnámp kar

¹¹Kwaro Israel firan lo sánkámp te Livai firao pris yakáprá Israel firan taokeyakápnap ke fekimpon. Am pris tére nap támao arop fwapokwapia yae-párák kare kák nánkoria te, apaerá warko pris ankwap Aron yak námp niamp mono, ‘Melkisedeko yak námp niamp pourouráp pris yakano’rá sénaenámpon? ¹²Pris manénkirkamp pwar napo, ankwap am éri mek koroepa yakáp nap te, loao kor taknámp naenámpon. ¹³Kwaro ‘Pris yaká yak naenámprá sénámp arop am te Livai fi mekamp mono. Mwar ankwap fi ara, alta fek pris tére moiapono. ¹⁴Nomo te wae mér námp: Nomp Tokwae Kar korop námp te Juda fi mekampono. Tá Moseso kor am fi ‘Pris yakápenk’rá sér moimpon.’^a

Jisas te Pris Tokwae Melkisedek niamp yaká yak konámp kar

¹⁵Nomo wanámp kar fi kor érik yak námp te: Pris wourékam Melkisedek niamp yak námp te, ¹⁶pris yakáp i konap lo karao ‘Amo fwap

^y 7:3 Hi 7:15-17 ^z 7:5 Nam 18:21 ^a 7:13-14 Mt 2:6

pris yakae'rá sénámpanápe. Ankár náráp yiki yaká yak konámp kárákáre fek Kwaro man 'Pris yakae'rá sénámpon. ¹⁷Kwaro náráp Buk fek sérrá:

"Amo te ankár Melkisedeko yakámpnám taknám pris yaká yak nanapono."^b

¹⁸Wokwaekamp lo kar te kárákáre moria nomwan yaewour naenámpon mo námpantá Kwaro wae sámp-sirari námpon. ¹⁹Lo kar fek te ankwap ankank yae-párák kare yak moimpon. Aenámpaná maok, Kwaro ankwap kwapwe kare mwae kup kik-pwaránko maok, am mwae támao kwapwe kareriaka lo kwe-pwaránko maok, nomo oukoumwan fwap Kwaromp wonae fik tukup námpon.^c

²⁰Kwaro Jisasén 'Pris yakae'rá sérimp te kwaporok párák 'Yakae' ria sér mono, fou e sériaka 'Yakae'rá sérimpon. Pris fákáre wokwaek yakápap te, arop ankárankao fou e séria 'Yumo pris yakápenk'rá sér moimpon.

²¹Kwar námoku Jisasén 'Amo pris yak nanap' ria fou e sérimp kar maomp Buk fek yak námpon te arakrá sér,

"Kwar Tokwaerao fou e séria,

'Amo ankár pris yaká yak nanapon'rá sérimp te,

warko am sérinámpon kar pwarará ankwap kar sér mono."^d

²²Kwaro fou e sérimpara, Kraiso tére námpon te, am kontrak te wokwaekamp kontrak kwe-pwararea, ankár yae-párák kare yaká yak naenámpon.^e

²³Pris fi te ankárankamp fi támao mwar yakápá yakáp mono. Manénkirkamp kápae kare wourrá tukup napo, wakmwaek am mek-am mekrá yakáprá tukup konaponono. ²⁴Aeno Jisas námoku mao pris térerá yak námpon te pwar nánko, ankwap pris am éri mek korop mono. Ankár yaká yak námpara, ²⁵arop Jisasén mér námpon fek Kwaronámpon korop mwaria napo te, mao te am fárákapan ankár warko éréképeanánko, yakápá yakáp mwanaponono. Am te apaerianámpanápe, mao ankár yaká yakria kumur méntép Kwaro 'Am fárákapan yaewourano' ria Kwarén sér i konámpon.^f

Pris Tokwae Jisas te kárákáre korara, fwap nomwan yaewour naenámpon

²⁶Take pourouráp Pris Tokwae te nomwan fwap yaewour naenámpon. Mao te yiki karia, nkwak mo mak mo, kwatae ninik yak mo, kwatae ninikráp aropént yak mo, amwar kar yak nánko, Kwaro man warámpeaka yámar mek narek karaok pap námpon.^g ²⁷Pris Tokwae wokwaek téreap te, kumur méntép námokuráp kwatae ninikanénkir ofa sánktea yakáprá maok, tá wakmwaek koumteouráp aropamp kwatae

^b 7:16-17 Sng 110:4 ^c 7:18-19 Ro 8:3-4; Ga 2:16 ^d 7:20-21 Sng 110:1 ^e 7:22 Hi 8:6
^f 7:25 Ro 8:34; 1 Jo 2:1 ^g 7:26 Hi 4:15

ninikan ofa sánk konapon. Aeno Jisas te kwatae ninik yak mo námpara, takrá tére mono, ankár námokuráp pourouran ankárankamp por Kwarén sánkámpon.^h ²⁸Lorao manénkir yakápap aropan ‘Pris Tokwae yakenk’rá sérimp te, kwatae ninikráp aropara, kárákáre mono. Am loaomékir akwap tenko maok, Kwaro wakmwaek fou e sérimp te, náráp Táráp ‘Pris Tokwae yak naenámp’ ria sérimpara, Kwaro sánkámpon tére ponankor wae yae-párák kare térea pwate nánko, am tére te ankár yaká yak námpon.ⁱ

Jisas yámar mek Pris Tokwae yaknámpon kar

8 ¹Nomo mámá sénámpon kar fi te ará: Nomo te wae nomp Pris Tokwae yak námpon, mao te yámar mek King Tokwaeramp sia tank námpon fek maomp yae-párák mwaek tank námpon. ²Mao te yámar mek Kwaromp yiki kor nap mek pris tére námpon. Am nap te lotu nap kare, aropao ti mono. Tokwae Karao námoku ti námpon.^j

³Ponankor Pris Tokwae fákáreramp tére te Kwarén nkwaekwe make ofa, tá fir émian ofa nénk konapara, nomp Pris Tokwae Jisaso kor wae ankár Kwarén ofa sánkámpono. ⁴Mao kor apárok yakria te Pris yak mono. Am te apaeria námpanápe, apárokamp arop ankwap fárákapao Pris Tokwae yakápria, lo karaok Kwarén nkwaekwe make ofa nénkapara. ⁵Am fárákap pris téreap te, apárok yaknámpon lotu nap mek téreapono. Am lotu nap te yámar mekamp lotu nap yiki kor karean wounáprá niapon. Am te Kwaro Mosesén sérimp niampono. Moseso lotu nap sel ti naerianánko, Kwaro sérrá, “Amo am lotu nap ti nap kwamp te, fwapnae karia taokeyak kourrá kápae kare ankank ponankor ono amwan faonkwek yénkép nampaok taknámpon karampo.”^k ⁶Aerimpan maok, Jisas térenámpon pris tére te ankwap pris fárákapao téreapan kámákár akwapámpono. Am te apae riteanápe, Kwaronámpon mwaek nke, arop nomwan Kwaro kontrak papnámpon mwaek nkerá amore mek yak námpon. Kwaro wokwaek ‘Nénk nanámpon’rá sérimp kar am wourékam kontrak mek yak námpon sérimp kar manénkirkamp kontrak mek yak námpon kámákár akwap námpono.^l

Wakmwaekamp kontrak manénkirkamp kontrakan kámákár akwapnámpon kar

⁷Manénkirkamp kontrak támao ankár arop yae-párák kare fwapokwap nánko te, Kwaro warko wakmwaek kontrak wourékam ankwap yoro mono. ⁸Kwaromp Buk fekamp karao sénámpon te, Kwaro náráp arop fárákapamp kwatae ninik yénkép námpon te arakrá sénámpon:

“Kwar Tokwaerao sérrá, ‘Wawenke.

Nánkáráp wakmwaek ankwap ke fek te

^h 7:27 Ef 5:2; Hi 10:10 ⁱ 7:28 Hi 5:1-2,9 ^j 8:1-2 Hi 1:3,10-12 ^k 8:5 Kis 25:40; Kl 2:17
^l 8:6 Hi 7:22; 9:15

- ono Israel fi ntia Juda firént
kontrak ankwap wourékam tére nanampon.
- 9 Má kontrak wourékam máte
wokwaek am fárákapamp appeyaenápen
apár Isip mekamp yae topwe fek éréképámp fek
kontrak yoroiampan maok,
am fárákap am onoinamp kontrakaok paokop mo napo,
ono am fárákapan younkwek siraramp kontrak niamp
take mono.’
- 10 Warko ankwap kar sérrá,
‘Ono warko wakmwaek Israel firan ankwap kontrak
yoro nanamp te ará:
Onomp lo kar am fárákapamp ninik mek pap nanko,
am fárákapao onomp lo kar man mér napo,
ono am fárákapamp Kwar yak nanko,
tá nopok am fárákapao kor
onomp firáp arop yakáp mwanapon.
- 11 Am ke fek te arop ankwapao
ankwap fárákapan yénkria
‘Yumo te Tokwae Karan mérenk’rá sér mono.
Waeman ponankor mér kánanke nap,
tá mér tokwaenap aropao kor
onan méri yakap napon.’^m
- 12 Ono am fárákapan yonkwae touweria,
nkwakwe make kwatae ninik tirá épéria pwarará maok,
ono am fárákapamp am kwatae niniki nap te
warko nik mo pwar nanampon.’ ”

Kwar Tokwaerao arakrá sérimpon.ⁿ ¹³ Kwaro am wourékam kontrakan
sénámp te, wokwaekamp kontrak te wae épi kwataeria kánanke kwarok
ke fek moyak naerámpon. Aeno nomo wae mér námpon: Ankank
akwapea épi námp te, waeman turupwia ponankor moyak naerámpon.

Wokwaekamp pris fir yiri fek ofa sánk konap kar

9 ¹ Am manénkirkamp kontrak te lotu mwanap lo, tá mámá apár mek
yaknámp sel fekamp lotu nap aropao ti mwanap lo yakámpon. ² Am
sel fekamp nap tiap te, anánk aokorea maok, wonae fikamp aokore yink
konap mek te am mek lam tank, tá Kwarén ofa sánk konap pan, makiaka
am fek kák konap kákánar yak námpon. Am aokore te ‘Yiki Kor’rá sér
i konapon.’ ³ Waemyam fek youpoukwap tenap mekamp aokore ‘Yiki
Kor Kare’rá séria maok, am mek tankápnámp ankank te anánkaopwe:

^m 8:11 1 Jo 2:27 ⁿ 8:8-12 Jer 31:31-34 ^o 9:2 Kis 25:23,30-31,37

⁴Gol fek oupouroupnap alta, am fek paura nánákáre yankap konap, tá kontrak bokis, gol fek ponankor oupouroupnap, am mek tankáp nám̄p te gol fekamp sospen mek fári konap mana papea nap, tá Aronomp mear yaopwae wokwaek taoimp, tá yumwi worare anánkaopwe am fek Kwaro lo kar kumwiakám̄p, makiaka am kontrak bokis mek tankápám̄pon.

⁵Am bokis yumuntukamp kour fek te Kwaro koumteouráp aropamp kwatae ninik aropompia tirá épér i konám̄p yak nám̄pon. Tá ensel anánkaopwe niamp yoroi pwate napo, am bokis yumuntuk yak nepo maok, am enselomp yawor yowe pwae bokis yumuntuk fupukurae yak. Am ensel yawor te Kwar am mek yak nám̄pan yénkép nám̄pon. Aeno ono oukoumwan te má kar má ponankor, fi farákarea pwar nanamp pourou mono.^p

⁶Am takia maok, ankár kumur méntép pris fákáreráo Yiki Kor Aokore mek am mek tére konapon.^q ⁷Aeno yopwar méntép Pris Tokwaerao saráp ankáránk por am ankwap Yiki Kor Kare Aokore mek yoump konám̄pon. Mao Yiki Kor Kare Aokore mek yoump konám̄p te kwaporok yoump mo i konám̄pon. Ankár Kwaro kwatae ninik tirá épér naenámp fir yiriran saráp samp-youmpea, námokuráp kwatae ninikanénkir ofaria maok, wakmwaek fikamp arop fwapia mér moitea térenap kwatae ninikan ofa i konám̄pon.^r ⁸Pris fákáre takrá tére konap táman, Yiki Kor Spiritao nomwan yénkép nám̄p te, aropao am sel fekamp lotu nap oukoumwan térerá yak nánkoria te, Kwaromp Nap Aokore Yiki Kor Kare mek yink mwanap mwae te érik farákár mono. Oukoumwan sikono.^s ⁹Am sel fekamp lotu nap mek te, oukoumwan mámá ke fek korop nám̄pan wounáprá yénkép nám̄pon. Am sel fekamp lotu nap mek te Kwarén fir nénkria, ankwap ankank ofa sánk konapono. Aeno am ankank ponankor te am lotunap arop farákapamp ninik fwapokwapia yiki kukarrá pap naenámp pourou mo nánko, arop farákap kwatae ninik yak monorá mér mono.^t ¹⁰Am lo kar te, énráp fir fépér i konap ankank, tá nkwakwe make ént-éntup i konap, aran sérar napon. Am ankank te pourou fekamp sarápono. Am lo te Kwaro koumteouráp aropan sánk tenánko, ampaokrá tukupea Kwaro ankank ponankor fwapokwap naenámp ke fek mwanapria nimpon.

Krais námokuráp yiriran Kwarén ofa sánkám̄p kar

¹¹Aeno oukoumwan te wae Krais ékianám̄para, mao Kwaromp kwapwe kare ankank korop nám̄pamp Pris Tokwae yae nám̄pon. Mao am sel fekamp lotu nap kwapwe kare mek yoump nám̄p te, wokwaekamp sel fekamp lotu napan kámákár akwap nám̄pon. Am lotu nap te mámá apár

^p 9:3-5 Kis 37:1-29 ^q 9:6 Nam 18:2-3 ^r 9:7 Kis 30:10 ^s 9:8 Hi 10:19-20

^t 9:9 Hi 10:1-2

mekamp moara, aropao yae fek ti mono. ¹²Krais te mememp yiri, tá bulmakau morokamp yiri sámpea am Nap Aokore Yiki Kor Kare mek yoump moi námpon. Mao ofa sánk námp te námokuráp yiriran sámpea am Nap Aokore Yiki Kor Kare mek ankárank por yoump námp te, nomwan warko yamokwapea éréképeanánko yakápá yakáp mwanámpria ninámpon.^u ¹³Táte arop fárákap Kwaro nke námp fek oum nánko te, pris fákárerao meme yiri, bulmakau youroup yiri makia tia maok, bulmakau énti yankapnap éntu éntént ouroukoup, makia tia fákeyakrá maok, am táman arop pourouk pápárámpapo maok, Kwaro nke námp fek aropamp pourou yiki kukur kwapwe konámpon.^v ¹⁴Aeno tá nopok Kraisomp yiri te am táman kámákár akwap námpon. Krais te kwatae ninik yak mo kareno. Aenámpara, yaká yak konám Spiritamp kárakáre fek saráp námokuráp pourou Kwarén ofanámp sánkámpon. Am yiri te pourouan saráp yiki kukarrá pap mono. Mao te nomoinám kwatae ninik ponankor tirá épérianánko, nomo Kwaro nke námp fek yiki kukur yakáp námp wae mérámpon. Aenámpara, nomo te warko yiki yak mo i konám loak tukup mono. Nomo ankár yaká yak konám Kwaromp téteran tére mwanámpon.^w

Kraisomp yirirao wourékam kontrak mek kárakáre sánknám kar

¹⁵Jisas sumpwi nánko, maomp yiri kwarákarimp te, koumteouráp aropan warko yamokwapea woukouroukamp kontrak yakámp fekamp kwatae ninik ponankor tirá épérimpon. Aeria maok, mao te amore mek yakria Kwarnám mwaek nke, arop nomonám mwaek nkeriaka kontrak wourékaman kárakáre sánk námpara, arop ponankor Kwaro wumwinám kar wawia mántwaok tukupnap arop te Kwaro wokwaek sérimpaokria, yae-párak kare yakápá yakáp napon.^x

¹⁶Arop, nánkár sumpwi nanko ankank sámpampria te, maompria e fárákapnám kar te pepa fek kontraknám kumwi konámpon. Tá tárápao naropworo séritenám ankank sámp naerianánko te, arop fárákap manénkir arakrá mér, naropwar te wae sumpwi námpara, táráp te numwar maomp ankank sámpano ri konapono. ¹⁷Arop oukoumwan sumpwi mo nánko te, am sámpamprinám ankank oukoumwan kwaporok yak konámpon. Aeno nánkár sumpwi nánko maok, am sérinám kar te kárakáre námpara, waeman am ankank sámp konámpon. ¹⁸Tá taknám, fir yankop napo, sumpwi nánko maok, am fir yiri pápárám napo maok, wokwaekamp kontrak táman kor kárakáre sánkámpon. ¹⁹Manénkir te, Moseso koumteouráp aropan Kwaromp lo kar ponankor farákápámpon. Tá wakmwaek bulmakau morokamp yiri

^u 9:12 Ef 1:7-8 ^v 9:13 Wkp 16:3; Nam 19:17-18; Hi 10:4 ^w 9:14 1 Pi 1:18-19; 1 Jo 1:7
^x 9:15 1 Ti 2:5; Hi 8:6

sámp, memeramp yiri sámpea éntént arákár. Tá sipsip pwae noumouri pen fek forokwap námp, yao hisop poro kor fek yarokwapea maok, ént mek anámpea am yiri táman buk fek pápárámpria maok, koumteouráp aropamp pourouk kor ponankor pápárámpimpon. ²⁰Aeria maok, arakrá sér, “Mámá te Kwaro yumwan ampaok mwanaponrá sérinámp kontrakan kárakáre sánk námp támaono.”^y ²¹Tá taknámp, Moses te sel fekamp lotu napan yiri pápárámpria maok, nap mek am mek tankápámp diráp ankank ponankor méntér pápárámpimpon. ²²Aenámp te nomo wae mér, loamp ninik fek te, ankank ponankor ankwapmwaek te yirirao saráp Kwaro nke námp fek yae-páráki pap námpono. Aeno fir yiri kwarákár mo nánko te, Kwaro koumteouráp aropamp kwatae ninik tirá épér mono.

Kraiso kwatae ninik tirá épér naeria, námokuráp pourou ofa sánkámp kar

²³Am ofa sánkria yiki kor nap mekamp ankankan pápárámpia torokor naponon. Am yárárnámp ankank te yámar mekamp ankank kareeran wounáprá yénkép napon. Aeno yámar mek yaknámp ankank kare yiki kukur yak námpanánko te, ankár kwapwe kare kare ofa, nape firamp ofaran kámákár akwap naenámp. ²⁴Nomo te wae mér námpon: Aropao yae fek yiki kor nap tia nap, Kwaromp nap kareeran wounápnámp nap mek te Jisas am mek yoump mono. Waeman yámar mek kar pok námpon. Tá oukoumwan te mao waeman Kwaromp wonae fik kar yakrá, nomwan yaewour námpon.^z

²⁵Yopwar méntép Pris Tokwae fir yiri sámpea Yiki Kor Kare Aokore mek yoump ko, Kwarén ofa sánk konámpon. Jisas te tak moi námpon. Mao yámar mek poka Kwarén ofanámp námokuráp pourouran ponankor sánk námp te kápae kare por moi námpono. ²⁶Táte mao kápae kare por takria te, mao touwe sámp saráp yakria, ankár Kwaro apár yoroimp feknámpia takrá koropea oukoumwan mámá ke fek naempao maok, mono. Oukoumwan te wae pwar naenámp ke wonae fik nánko, Kraiso apárok ankárank por ék námp te námokuráp pourouran ofanámp Kwarén sánkeaka kwatae ninik tirá épéri námpon. ²⁷Ponankor aropao kor ankárank por sumpwiaka nánkár wakmwaek kot mwanapon.^a ²⁸Tá taknámp Kraiso kor námokuráp pourouran ofanámp Kwarén ankárank por sánkeaka, kápae kare aropamp kwatae ninik tirá épér naenámp touwe sámpámpon. Tá nánkár wakmwaek ankwap por ék námp, am ke fek te kwatae ninik tirá épér mono, ankár arop mao ék naenámpria yépékrá yakáp napan párák éréképea pok naenámp.^b

‘Woukouroukamp ofa te kwatae ninik sámp-sir mono’rá sénámp kar

10 ¹Am Mosesomp lo kar te wakmwaek korop naenámp ankank kwapweramp wounáp karan nomo nke námpono. Aeno mao te

^y 9:19-20 Kis 24:6-8; Wkp 17:11 ^z 9:24 1 Jo 2:1 ^a 9:27 Stt 3:19 ^b 9:28 Fl 3:20; Hi 10:10; 1 Pi 2:24

am ankank nomwan fwapnae karia érik yéncép mo námpon. Loao sérrá, ‘Yopwar méntép ankár ankárankamp aopwe ofaran sánk kip’rá sénámp te, am lo te Kwaronámpok korop mwanianap aropan te fwapokwapia kwapwe karerá kák mono.^c ²Tá lorao fwapokwapianánko, yae-párak kare yakápria te, warko apaerá ofa sánk mwanapanáp. Táte am ankárankamp ofa támao Kwaromp lotu nap mek koropnap koumteouráp aropamp ninik yiki kukarrá páte nánko te, kwatae niniki námp yak námprá ninik mono. ³Ae mwanapan maok, mono. Yopwar méntép am ofa táman sánkriaka nke napo, náráp kwatae ninik oukoumwan yak námprá ninikitea mér i konapon. ⁴Amnap fi kor te ará: Bulmakau youroupamp yiri, memeramp yiri te ankár kwatae ninik te tirá épér mo karenono.

⁵Aenámpantá maok, Kraiss apárok ékiaka Kwarén sérimp kar Buk Song fek yak námp te arakrá sérimpon:

“Amo fir yankopea ofa sánk te monoria napon.

Aeno amo te pourou ankwapan maok onan sáp naeria nánap napon.

⁶Am fárákapao fir énéni kor yaomwi mek yankapria, kwatae ninik tirá épér i konap ofa te amo warákár mo kare napon.^d

⁷Aeno oukoumwan te ono arakrá sér:

‘Kwar, ono wae ék nampono.

Am te wokwaek kar ono nanampan buk fek kumwiap niampono:

Oukoumwan te ono wae waráp ninikaok nanampria ék nampono.’”

⁸Manénkir sérinámp kar te ará: “Lo karaok térenap ofa te, fir yéncéprá, nkwakwe make ofa nénkrá, tá nkwakwe make fir yaomwi mek ponankor yank i konap ofa, tá kwatae ninik tirá épér i konap ofaramp ninik, am te amo warákár mo napon.” ⁹Tá wakmwaek mao arakrá sér: “Ono wae waráp ninikaok nanampria ék nampono.” Aeria maok, Kwaro am manénkirkamp ofa sánk konap ninik te sámp-sirarrá, am éri mek wourékam ofaran pap námpon. ¹⁰Jisas Kraiss te Kwaromp ninikaokria ankárankamp por náráp pourou ofanámp sánkámpon. Am meknámp ninik támao nomwan Kwaromp koumteouráp arop kare yoroi papeanánko, yiki kukur yakáp námpon.^e

Kraisomp ofa kwatae ninik tirá épér naenámp pwinámp kar

¹¹Pris fákáreráo tére saráp yakápria kumur-kumur tére nap te, ankár am i konap ofa táman saráp tére napan maok, am taknap ofa te kwatae ninik te tirá épér mo karenono. ¹²Aeno Kraiso ofa ankárank sánk námp fek kwatae ninik tirá épéri námp te, ankár kápae kare por takrá yakrá akwap naenámp. Mao te takia pwarará, Kwaromp yae-párak mwaek

^c 10:1 Kl 2:17 ^d 10:5-6 Sng 40:6-8 ^e 10:10 Hi 9:12

tank námpon.^f 13 Tá mao te Kwaro maomp yopor arop maomp yae ankore mek kák tenánko, yakáp mwanap keran yépékrá tank námpon.^g 14 Am koumteouráp arop fárákap te mao ankáránkamp ofa fek fwapokwapia yiki kukarrá ankár kwapwe kare napara, am fárákap te fwap ankár yae-párák kare yakápá yakáp mwanapon.

15 Yiki Kor Spiritao kuri nomwan kar arakrá farákáp námpon:

16 “Kwar Tokwaerao sérrá,
‘Wakmwaek ono am fárákapént
kontrak wourékam yoro nanamp te ará:
Ono am fárákapamp mér ntiaka ninik mek
onomp lo kumwiaka pwar nanampon.’ ”

17 Warko ankwap kar am feknámp kirimprá arakrá sér, “Ono te am fárákapamp kwatae ninik tirá épéria, warko ninik mo pwar nanampon.”^h

18 Tá Kwaro kwatae ninik wae tirá épéritenánko te, warko kwatae ninik tirá épér mwanap ofa sánk mwaria tére mono.

Nomo ankár mér kareria Kwaromp wonae fik tukup mwanámp kar

19 Kémpiyae tárápu, waeman Jisasomp yírao nomp kwatae ninik tirá épéri pwate námpara, nomo te apáp mono. Fwap Kwaromp Nap Aokore Yiki Kor Kare mek yink mwanámpon.ⁱ 20 Jisas námoku mwae kup wourékam kérémp námpon. Mao námoku támao am mwae kupria, mao yiki yak fi korara, nomo te fwap am waempyam pearákari námpon mek mwaeknámpon yoump mwanámpon. Am te Jisasomp pourouan wounáp námpon támaono.^j 21 Nomo te wae Kwaromp firáp koumteouráp arop taokeyak konámpon Pris Tokwae yak námpon. 22 Nomo nomp kwatae ninikan méria pwarápaenámp ninikan mao te námokuráp yiri fek tirá épériaka, nomp ninikan yáráriaka yiki koriaka paprá, nomp pourouran kor yiki kor ént niamp fek éntupia pap námpono. Aenámpara, nomo ankár kwekár ninik te pwararea maok, Kwarén mér kareria maomp wonae fik tukup mwanámpon.^k 23 Nomo ‘Kwar te am sérinámponakrá tére naenámpnonoria, maomp kwapwe kare ankankantá kárákáre fek yépék mwanámpon’an sér i konámpon. Am te apae riteanápe, nomo te waeman mér námpon, Kwaro tére nanamprinámpon ankank te ponankor kare kar tére konámpon.^l 24 Nomo ankákáránk ankár Kwaromp koumteouráp arop ankwap fárákapán ninikria maok, tá am fárákapán sérrá, ‘Yumo te ankár arop ponankor warákár konap ninik fek yaewour kip’rá sér mwanámpon. 25 Tá Kwaromp koumteouráp arop nomo te Kwarén lotu mwaria koupoukour konap ninik ankwap fárákapao i konapnámpon araknámpon pwar mwareano. Kraís ék naenámp yae te waeman fápaé

^f 10:12 Hi 1:3 ^g 10:13 Hi 1:13 ^h 10:15-17 Jer 31:33-34 ⁱ 10:19 Hi 4:16

^j 10:20 Mt 27:51-52 ^k 10:22 Ef 5:26; 1 Jo 1:7 ^l 10:23 Hi 4:14

námpara, nomo te ankár kárákáre fek térieriaka nonopok Kwaromp karan fárakáp nánko, am támao arop ankwap fárakapamp ninik mek kárákáre nénk naenámpon.

‘Kwaromp Tárápan younkwe sánk kwapono’rá sénámp kar

²⁶Nomo waeman Kraisomp kar kare wawi námpao, am ninik wampweri pwarará warko kwatae ninik fek paokop nánko te, am kwatae ninik tirá épér mwanap ofa ankwap te yak mono. ²⁷Aenámpara, nomo te ankár apáp kareria kot mwanámp yae táman yépékrá yakáp mwanámpon. Tá Kwarén yorowarnap arop te ponankor yaomwi tokwae touwe fopokornámp mek épér naenámp nánapi yak námpon. ²⁸Nomo te waeman mér námpon: Arop ankárankao Mosesomp lo kar kwe-pwaránko te arop anánkaopwe, tá yininkaopwe, arakerao mao sokoroinámp kar wawia sénapo te, am aropan te aropomp mono, mao te ankár sumpwi naenámpon.^m ²⁹Yumo te Kwaromp Tárápan younkwe sánknaámp aropan te mokoprá ninik rape? Am kontrak te karenorá yénképnámp yirirao am aropan torokoria páte nánko, yiki kor kwapwe kare námpao maok, am arop te warko Kraisomp yiri am te kwatae niampia pap námp te yonkwae touwe konámp Spiritan mékia kwatae pap námpon. Aenámpara, mao te Mosesomp kar kwe-pwarap aropao sámpap touweran kámákár akwapnámp sámp naenámpon.ⁿ ³⁰Nomo te waeman mér námpon, Kwaro sérrá, “Nopok i konap ninik te onokump térenono. Onoku támao nopok am fárakapan nénk nanampono.” Aeria maok, ankwap kar sérrá, “Nánkárap Tokwae Karao námoku kotria náráp arop ponankor younkoup naenámpon.”^p ³¹Yiki yak konámp Kwaro arop ti-fákeyakrá kot naenámp te, am te kwatae kare ara, nomo te ankár apáp tokwae mwanámpon.

Kwarén mér námp ankár kárákáre fek fokokeyakáp mwanámp kar

³²Yumo má kar máte ankár ninik kip: Wokwaek yumo te Kwaromp wae sámpap fek te, am ke fek táman yumwan nkwakwe make kar sérarapan maok, yumo kárákáre fek yakápria am kwe-pwararapon. ³³Ankwap ke fek yumwan arop nkeap fek kuk pátea nkwakwe make kar kwatae séraria maok, yumwan fupukrá touwe nénkapon. Tá ankwap ke fek te yumo napnámp touwe sámpnap aropan aropompria am fárakapan yaewouria, yonkwae porokwe sánkapon. ³⁴Arop ankwap fárakapao kalabus mek yakápapo, yumo aropompria yaewouriapon. Ankwap ke fek te, aropao ankank tirá, makapo kuri yumo wampwe kwae, kwaporok námoku mwar takanáponoria pwatea warákarrá yakápap te, yiráp yaká

^m 10:28 Lo 17:6 ⁿ 10:27-28 Mt 26:27-28 ^o 10:6-29Hi 6:4-8 ^p 10:30 Lo 32:35-36; Ro 12:19

yak naenámp ankank kwapwe yak námp táman méri yakáp nap kwamp napon.^q

³⁵ Yumo te ankár yumo wokwaekiap kwapwe kare ninik aran níkia, yiráp am mér kárakáre te pwar kwapono. Kwaro nopok yiráp por ankank kwapwe tokwae pátenámp sámp mwanapan kárakáre fek yénkép kipo.

³⁶ Ae mwanapara, yumo te ankár kárakáre fek yakápria maok, Kwaro warákárnámp ninikaok tukupriaka Kwaro yumwan wokwaek kar sérrá, ‘Yiki yakáp mwanap kwapwe kare nénk nanamp’ ri námp fwap sámp mwanapon.’^r ³⁷ Karenono, Kwaromp Buk fekamp karao arakrá sér:

“Am arop ék naeria te wae faenámpara,
koupour kar ék naerámpon. Mao te yépék mono.”^s

³⁸ Aeno onomp yae-párak kare arop te
mao te wae mér námpara, yiki yak naerámpon.
Táte arop onan mér námpao
warko pwarará arákarrá akwap nánko te,
ono man te warákár mono.”^{t u}

³⁹ Tá nomo te apae Kwarén mérnámp pwarará arári tukupea, moyakáp mwanámp aropanápe. Mo karonno. Nomo te Kwarén méri yakáp námpara, yiki yak sámp mwanámp aropono.

Mérnap ninik firamp kar

11 ¹ Karenoria mérnámp ninik te Kwaro nomwan yaewour naenámpria yépékrá yakápnámp ninikan saráp sámpea méria paokop námpon. Am ankank te nomo yi fek nke mo námpao maok, nomp ninik te, am te kare kar yak námponoria mér i konámpon.”² Wokwaek yakápap arop te, Kwar te karenoriaka mérapantá maok, Kwaro am fárakapan kwapwe kare ninikan warákárria sérrá, “Am fárakapamp ninik te yae-párak karenono.”³ Nomo te waeman Kwarén mér námpara, Kwaro yámar ntiaka apár yoroimp te, námokuráp kar fek saráp séránko yakámp te, wae méri yakáp námpon. Tá kápae kare ankank nomo nke námpan kor Kwaro nomo nke mwanámp pourou monámp ankank fek yoroi námpon.”^w

Abel, Enok, Noamp kar

⁴ Abel te Kwarén waeman kare karonoria méria yárakria maok, mao Kwarén sánkámp ofa te yae-párak kareara, Kenomp ofaran kámákár akwapámpon. Kwaro Abelomp mér nkea, mao te yae-párak kare aroponoria warákárria maok, maomp ofaran kor warákarimpon. Abel te wae sumpwi tenánko maok, mao Kwar te karenoria mérnámp karao yakria nomwan oukoumwan kor farákáp námpon.”^x

^q 10:34 Mt 6:20 ^r 10:36 Hi 6:12 ^s 10:37 Yé 22:20 ^t 10:38 Ro 1:17

^u 10:37-38 Hab 2:3-4 ^v 11:1 2 Ko 5:6-7 ^w 11:3 Stt 1:1 ^x 11:4 Stt 4:3-5

⁵Enok te Kwarén mérámpantá maok, sumpwi mo, yiki yakámp fek Kwaro warámpea yámar mek pok tenko, arop man nke mo, oupouroukrá paokopia pwarariapon. Kwaromp kar Buk fek yak námpao sénámp te, “Oukoumwan Enokén warámp mo fek, Enok Kwaromp karaok yarákánko, Kwaro man warákárámp kwamp man warámpámpon.”^y

⁶Arop Kwarén méria ‘Kare kar yak námpono’rá sér mo námp te, Kwaro man warákár mo i konámpon. Aeno arop Kwaromp wonae fik akwap naeria námp kwamp te, mao ankár Kwar yak námponorá méria maok, tá man oupouroukia nkenap arop fárákapan yae-párák fwapokwap i konamp mént mér kuno.

⁷Noa kor Kwarén karenorá mérámpantá maok, Kwaro kor Noan wakmwaek korop naemp ankank séránko maok, Noa te am ankank oukoumwan nke mo námpao maok, Kwaro sérámp karan kare námponoria maok, sip ankárank yoroimpon. Aea maok, námokuráp yupu, tárápu makia éréképea youmpea am sip mek yakápria faokor mo, fwap yae-párák kare yakápiapon. Noa takimp te, maomp mérao ponankor koumteouráp aropamp kwatae ninik érik yéncép námpon. Noa Kwarén méránko, Kwaro man ‘Yae-párák kare aropono’rá sérimp te Kwaro námwan mérnep ponankor aropan sér i konámp niampono.^z

Abrahamomp kar

⁸Abrahamo Kwarén méria maok, Kwaro man ‘Koropae’rá séránko, Abraham te Kwaromp karwaok akwapámpon. Mao náráp némp kare pwarará, Kwaro apár ankwap mao kareampor sánk naerianánko, ampok akwapámpon. Abrahamo kor am te fwapia mér moria, am te maok akwap nanaeriaka ninikrá akwapámpao maok, waeman mao kor Kwarén mérámp kwamp akwapámpon.^a ⁹Mao te waeman Kwarén mérámp kwamp akwapea Kwaro manénkir, amwan sánk nanamprá sérimp apárok akwapá tankámpon. Am apárok tankámp te ankwapamp apárok tank námp niampara, oukoumwan nap kare ti mono, sel fek saráp woukoup ko yakrá akwapeakánko maok, maomp táráp Aisako kor takrá akwapeakánko, appenáp Jekopo forokareakámp fekria maok, Kwaro am koumourean námo má apár sánk nanampri námpan yépékrá yakepon.

¹⁰Abraham te sel fekamp nap mek saráp yakria, yámar mekamp ankár yaká yak naenámp taunan yépékrá yakámpon. Kwaro námoku saráp am taun tére konap ninik námpara, námoku ti námpon.

¹¹Sara táráp sámp naenámp ke te wae akwap tenámpan maok, Abrahamo ‘Kwaro námwan sérinámp te pwar mo i konámpara, fwap tak naenámpono’rá ninikimpara, Kwaro man tárápamp naropwar yak naenámp kárákare sánkámpon.^b ¹²Abraham waeman mér pourou kwataeaka sumpwi

^y 11:5 Stt 5:24 ^z 11:7 Stt 6:13-22 ^a 11:8 Stt 12:1-5 ^b 11:11 Stt 15:6

naenámp fápaie námpao maok, am arop ankáránkamp fekamp kápaie kare tárápu forokarea te yámar mekamp térme yakáp nap niamp, tá ént mekamp kárák niamp nánko, arop te kouroump mwanap pourou mo naenámpo.^c

¹³ Am Kwarén mériap arop fákáre yiki yakápap fek te Kwaro sérinámp ankank kwapwe kare wae kare kar sámp mwanámpria warákárrá yépékra tukupea mént sumpwiapon. Am fárákapao kor oukoumwan am ankank nkeaka sámp moap fek kor warákárria maok, sérrá, ‘Nomo oukoumwan máma apár mek koropea yakáp námp fek te, ankwapamp apárok yakáp námp niamp oukwan yakáp námpon.’ ¹⁴ Am arop fárákap makrá sénap kar máte nomo waeman mér námpon, námokuráp némp karean oupourouk napon. ¹⁵ Tá am fárákapao am manénkir pwatea koropap némpnan ninikria te, ampok arári tukup mwarapon. ¹⁶ Ae mwarapan maok, am fárákap te am táman ninik mono, ankár waeman ankwap kwapwe kare apár sámp mwaria nap táman warákár kare napon. Am apár te máma apáran kámákarea kwapwe kare námpono. Am te yámar mek támaono. Kwaro am fárákapampor taun nánapi pwate námpara, am fárákapao ‘Nomp Kwar’rá sénapo, Kwar te am táman pwarápaie mono.

¹⁷⁻¹⁹ Kwaro Abrahamén wokwaek sérrá, ‘Aisak fekampao waráp appeyaenáp forokor mwanapono’rá sérimpon. Aeritea maok, wakmwaek mao Abrahamo náráp karaok akwap te mokoponrá nke naeria maok sérrá, ‘Waráp táráp Aisak ankáránkamp am te onan ofa sámpapo’rá sérámpantá maok, Abrahamo kor wawia méria, fwap Aisakén ofa sánk nanko te, warko Kwaro fwap apár me mekamp fárámpá pap naenámpria, náráp táráp Kwarén sánk naeria nimpon. Aemp te Abrahamo Aisakén warko apár me mekamp sámp námp niampimpon.^d

Aisak, Jekop, Josepomp kar

²⁰ Aisak Kwarén mér námpara, Jekop ntia Ison ourour wor-pwararea wakmwaek sámp nenep ankank sérimpon.^e ²¹ Jekopo kor Kwarén mérámp kwamp wae sumpwi naeriaka, námoku mearrá yarak i konámp mear yaopwae fek me kor yirip yakrá Josepomp tárápyaran ourour wor-pwarareaka, Kwarén lotuimpono.^f ²² Josepo kor wae Kwarén mérrá akwapea wae tékénouria sumpwinaemp wonae fikámp kwamp sérrá, ‘Nánkár wakmwaek Israel fi yumo warko Isip meknámp tukupria te, onomp kour mént sámpea tukup kip’ ria sérimpon.^g

Mosesomp kar

²³ Mosesomp éntupwar naropwar te Kwarén mérepara, éntupwaro Mosesén tankeanáko nkepo maok, táráp kwapwe kare námpantá, apáp

^c 11:12 Stt 15:5 ^d 11:17-18 Stt 22:9-12 ^e 11:20 Stt 27:27-29,39-40 ^f 11:21 Stt 48:15-16
^g 11:22 Stt 50:24-25

moria Isip mekamp kingomp kar ták-pwararea táráp porokwap-pap mo, yinink yunk fek mek wouroump fákeyakepon.^h

²⁴Wakmwaek Moseso téképá yakria Kwarén mérámp kwamp sérrá, ‘Onan te Isip mekamp Kingomp yupu-tárápamp táráponorá séri kwapono’rá sérimpon.ⁱ ²⁵Mosesomp ninik te kwatae ninikaokria fae tákáre ke fekamp ankank táman warákár te monoria maok, maomp ninik te ankár Kwaromp firáp aropént yakria ‘Énénki touwe sámp mwanámp’ ria sérimpon. ²⁶Maomp ninik te Kraiso nánkár sámp naenámp niamp pwarápaeran maomékir sámp námp te Isip mekamp mani ntiaka mopor i konap ankankan kámákár akwap námpon. Am te apaeria námpanápe, Kwaro wakmwaek nopok man sánk naenámp ankank kwapweran ninik námp kwamp kárákáre fek fokopeyak námpon.

²⁷Moseso Kwarén mérámp kwamp maok, Kingomp yoporan apáp mono, Isip pwarará akwapámpon. Aropao yi fek te Kwarén nke mono. Aeno Moses námoku te waeman Kwarén nkemp niampámp kwamp maok, Moses kárákáre yakámpon.^j ²⁸Moseso Kwarén mérámp kwamp maok, mao Kwaro Pasova yae tokwae pap nánko, ampaokria sérrá, ‘Enselo koropeaka poumou-tárápu nae-tárápu fupukrá kák naenámpono. Israel yiráp nae-tárápu fupukrá kákantá, sipsip porokwap papea maomp yiri sámpea ménki fek mwae foporokwamp kip’ rimpon.^k

Kápaé kare Israel fi Kwar te karenoria mér kárákáreap kar

²⁹Israel firao kor Kwarén wae mérap kwamp, Noumouri Kor Solwara tépérrá yink mwariakapo maok, Kwaro ént solwara porokwap fárákapánko, fárákár akwapánko, apár kar niampi yak nánko, tépérrá yinkapon. Aetenapo maok, Isip mekamp aropao kor am fárákapan éntér káki tukup mwaria yinkapo, warko éntao oupoupouránko surumpwiapon.^l

³⁰Israel fi te waeman Kwarén mérapara, Jeriko mekamp yumwi fekamp yár firi fákánek yae fek wapokwaprá paokopapo maok, am yumwi fekamp yár torokopi pikámpon.^m ³¹Kokopor yupu Rahap Kwarén mérámpara, Israel mekamp arop anánkaopwe koropea taunan kánánkámp youroukoupepo, am arop yaworan yaewourimpara, yorowar koropámp fek te Kwarén mér monap aropao faokorapo maok, mao te fwap yakámpon.ⁿ

³²Aeno oukoumwan te ono ankwap kar te apae karan farákáp nanampanáp? Ono te kápaé kare kar farákáp mono. Wae támaono. Ono te Gidion, Barak, Samson, Jepta, Devit, Samuel, aea maok, profet ponankor máte ono farákáp mono.^o ³³Am arop fákáre te Kwarén

^h 11:23 Kis 1:22; 2:1-2 ⁱ 11:24 Kis 2:10 ^j 11:27 Kis 12:51 ^k 11:28 Kis 12:21-23

^l 11:29 Kis 14:21-31 ^m 11:30 Jos 6:12-21 ⁿ 11:31 Jos 2:1-21; 6:25 ^o 11:32 Het 4:6-5:31; 6:11-8:32; 11:1-12:7; 13:2-16:31; 1 Sml 1:1-1 Kin 2:11

mérapara, yorowar kwe-pwararea maok, kápae kare kingomp ami fákáre yénképi pwarariapon. Ankwap fárákap te arop éréképea yae-párák kare ninik yénképrá tukupapon, tá Kwaro ankank nénk nanamprimp wae sámpapon. Aropao laionén arop yamp kwaponoria taokorapo, yourounkwe moiapon.^p ³⁴Arop ankwap fákáre Kwarén mérapara, yaomwi tokwae torokwari papapo maok, tá arop ankwap fákáre te pirikimpá tukupapo maok, man kor bainat fek fékérá épér moiapon. Tá ankwap fárákap te kárákáre moapo maok, Kwaro kárákáre sánkánko maok, wakmwaek kárákáre sámpea tae fek yorowaria maok, ankwap fi mekamp ami fárákapan yérépea kwe-pwarariapon.^q ³⁵Éntupwaryaenáp fárákap Kwarén mér napara, touwe koropánko tárápu faokorapo maok, Kwaro warko fápárampea kákánko, éntupwaryaenápo náráp tárápu warko tiapon. Tá arop ankwap fárákap fápákampia yakápapan yorowarap aropao sérrá, “Yumo Kwarén pwar napo te, yino yumwan surumpwirá kák mono.” Aerá sérapo maok, am fárákapao kor yorowarap aropao sénapaok mo, ankár Kwarén kárákáre fek méria maok, sérrá, ‘Yino te fwap apár me meknámp fárámpea kwapwe kare yiki yakáp mwanámp’rá sénapo, am fárákapao surumpwirá kákapono.’

³⁶Ankwap fárákap Kwarén mérapo, yorowarap aropao am fárákapan wouroumprá paok ke fek fupuk napon. Kwarén mérnáp arop ankwap fárákapan sen fek yaonkiaka kalabus mek kákapon.^s ³⁷Yorowarap aropao ankwap fárákapan yumwi fek yénképrá épéria maok, tá ankwap fárákapan so fek kuk-fékérá kákria maok, tá ankwap fárákapan bainat fek faoporrá épériaapon. Kwarén mérap arop ankwap fárákap yirimp mwanap ankank mo nánko, sipsip ntia meme yipiran kápérá, maok tukup mwarrá oupourounkapo, tá arop ankwap fákáre ankank ponankor mo nánko maok, tá arop ankwap fárákapan ankwap fárákapao ouroukuprá momwar sokororá paokopiapon. ³⁸Aeapantá maok, Kwarén mérap arop ankwap fárákap am te pirikimpea tukupea kwar saráp mek, faonkwek yakáp, tá ankwap fárákap pirikimpea péri me mek, tá kwar me mek tukupea am mek yakápapon. Am Kwarén mérnáp arop fákáreamp ninik te yae-párák karia, mwar pourourápi yak námpara, ankwap arop fákáreramp ninik te am kwapwe kare niniként akwapá pwi mo kareno.

³⁹Am arop fákáre ponankor Kwarén mér napara, Kwaro nkeaka warákarimpon. Aeno Kwaro nénk nanamprimp ankank kwapwe te oukoumwan sámp moiapon. ⁴⁰Am te apaeria námpanápe, Kwaromp ninik te, nánkár am fárákapao námont táman énéni tapokwapea mao wokwae kar nánapitenámp ankank kwapwe kare sámpea pwi yakáp mwanapria námpon.

^p 11:33 Dan 6:22 ^q 11:34 Dan 3:23-27 ^r 11:35 1 Kin 17:17-24; 2 Kin 4:18-37

^s 11:36 Jer 20:2; 37:15-16

Nomo ankár Jisasén méria man tokor-santukup mwanámp kar

12 ¹Aeno oukoumwan nomo mérámp te mokop námpon? Am kápae kare manénkir yakápiap arop Kwarén mér i konap ninik nomwan yéncépria, nomwan ikir-yakáp napon. Aenapara, kwatae ninik nomwan sámp-fákeyak námp te ankár tirá épéria pwarará, kápae naenámp ankank pourouk yakantá, woropea pwatea kakére fek am tukup mwanámp fek tokor-samprá kárákáre fek foporakorrá tukup mwanámpon.[†] ²Jisas támao nomp mér námp fi korara, oukoumwan kuri nomwan kárákáre sáprá, nomp mér námp ankár yaewourrá akwap naenámp. Ae naenámpara, nomo ankár Jisasén tokor-santukup mwanámpon. Wokwaek te Jisaso wakmwaek warákár sámp nanampria ninikria maok, yaopwae porokopramp fek touwe sámpea sumpwimp te, pwarápaé moi námpara, oukoumwan te Kwaromp sia king wonae fik yae-párák mwaek tank námpon.“

Kwaro nomwan fwapokwapria touwe sámp konámp kar

³⁻⁴Yumo te fwapia ninikia mér kip: Wokwaek kwatae ninikráp aropao Jisasén yoporrá paokopiapon. Aeapan maok, mao ankár kárákáre fek fokopeyakea touwe tokwae sámpámpon. Yumo kwatae niniként yorowar nap te, oukoumwan yumwan napo, yiráp yiri kwarákár mo námp te, yumo apaen apápia yiráp ménap pwarará poporokwe mwanapanáp.[‡] ⁵Ae te yumo Kwaro yumwan kárákáre sánkria sérinámp kar te ník moi napon? Mao yumwan te ‘Námokuráp tárápuno’rá sériaka, náráp Buk fek arakrá sér,

“Onomp táráp e!

Kwar Tokwaerao amo kwatae napo
amwan fwapokwapria apae touwe sank nánko te,
amo am táman kánanke kwataeran mpwe niniki kwapono.
Tá, amo tak te kwataenorá amwan yopor nánko te,
kokwae pwar kwapono. ⁶Am te apae riteanápe,
Kwar Tokwaerao námoku warákárnámp arop fárákapamp
ninikan fwapokwap i konámpon.
Táte Kwaro arop ankwap warámpea
man ‘Náráp táráp’rá sénámp kwamp te,
man kor paok ke fek porokwap konámpon.”^w

⁷Kwaro yumwan fwapokwap nánko te, numwar takanoria yéncépa yakáp kipo. Kwar te apárokamp naropwaryaenáp nomo kuri nomp tárápuan fwapokwap i konámp niamp taknámp námpon. Kwar te

[†] 12:1 1 Ko 9:24-25 [‡] 12:2 Hi 1:3; 3:1 [‡] 12:3-4 Mt 27:28-44 ^w 12:6 Yé 3:19; Snd 3:11-12

waeman náráp tárápunoria námp kwamp, yiráp ninik fwapokwap i konámpono.^x ⁸Kwar te náráp tárápu ponankor maomp ninik fwapokwap i konámpono. Táte mao yumwan fwapokwap mo námp te, yumo te maomp tárápu kare mono, yumo te kokopor fekamp tárápu niampono. ⁹Nomp apárokamp naropwaro nomwan fwapokwap nánko, nomo maomp yae ankore mek tukup konámponámp taknámp, nomp waempomp naropwarén kor fwap karia maomp yae ankore mek tukupria maok, nomo yiki yakáp mwanámpon. ¹⁰Nomp apárokamp naropwaro nomwan fwapokwap námp te, kánanke kwarok ke fek saráp námokuráp ninikaok fwapokwap námpon. Aeno Kwaro nomwan fwapokwap námp te, ankár nomwan yaewour saráp yak námpara, nomp ninik te ankár maomp yiki kare ninik niamp fek yakáp mwanámpon. ¹¹Am nomp Naropwaro nomwan fwapokwapria touwe sápnámp ke fek te nomo warákár mo i konámpon. Nomo te ankár touwe táman ninik i konámpon. Aeno mao nomwan fwapokwapia pwate nánko te, nánkár warko kwapwe kare ankank sámp mwanámpon te ará: Nomo ankár yae-párák kare ninik fek paokopria maok, yonkwae porokwe fek yakáp i konámpon.

Nomo ankár tae fek yakáp mwanámpon kar

¹²Ae konapara, yiráp yae kour me woukoupria porokwe yak nánko te, yae narek kakapria tére kipo. Táte yiráp pu kor ke sorokwampria sumpwi yak námp niamp nánko te, fárámprá fokopeyakea, ¹³mwaek kup fwapnae páraok tukup kipo. Yumo tak napo maok, yiráp pu kor ponankor kwataek akwap mono, warko fwap naenámpon.

¹⁴Yumo ankár arop ankwapént kwapwe kare tankápria yonkwae porokwe fek yakáp mwanap ninikaok kárákáre fek paokop kip. Tá yumo ankár kárákáre fek yiki kor ninikan saráp sámpea paokop kip. Am te apae riteanápe, arop yiki kor ninik fek yárek mo námp te Tokwae Karan nke mono.^y ¹⁵Yumo te ankár fwapnae karia méria paokop kip. Takria arop ankwap nomwan aropomp i konámpon Kwarén younkwe sánk naeane. Takria yumo ou mekamp ankwap ankárankamp yaopouroukao narákap konámponámp taknámp yumwan touwe sánk nánko, yumo ponankor touweria Kwaro nke námp fek kwataek ninik fek yakáp mwanape.^z

¹⁶Takria yumo arop ankwap kokopor ninik fek yárek naeane. Takria wokwae Iso impnámp taknámp Kwarén younkwek sir mwanape. Naropwaro nae-táráp Ison sérrá, 'Ankank má nánkár ono sumpwi nanko, amo sámp nanap' rimpan maok, tá nopok nánae-táráp Jekopo fir ankárank por yankapea Ison sánk nánko maok, Iso náráp am fek nae-tárápao sámp konámpon ankank kánanke kwarokan mpweria nánaeran sánkámpono.^a ¹⁷Yumo wae mér napon: Nánkár wakmwaek Jekopo Isomp

^x 12:7 Lo 8:5 ^y 12:14 Ro 12:18 ^z 12:15 Ef 4:31 ^a 12:16 Stt 25:33-34

ourour mént e-poup sámp tenánko, Iso kor náráp am ourour warko sámp naeriaka kárákárerá éma waempan maok, warko sámp naenámp pourou mo karimpono.^b

Nomo waeman Saion Faonkwek mek yakáp námp kar

18-21 Israel firao Kwaromp kar wa mwaria Sainai faonkwe ankore mek tukupea yakápapo, Kwaro Mosesén sérrá, ‘Yumo mapek yakápria arop ankárankao faonkwe fek yae pap nánko te, man yumwi fek yankop-papria, maomp bulmakauráp sipsipráp man kor mént yénkép mwanapon’rá sérimpon. Aeránko maok, Israel firao am karan wawia pwatea, am fek yakápapo maok, am faonkwek te yaomwi tokwae yak, kirikip támáre tokwae kar yak, tá ouwi kárákáre tokwae nánko maok, am fek táman wur kar, tá arop ankárankao kar kárákáre fek séránko maok, táte koumteouráp aropao am kar kárákáre táman wawiaka apápria Mosesén sérrá, “Yino am kar wa te mono.” Aeriaka am kar Kwaro sérimp táman mérap kwamp, am ankank táman nkea, apápa waeapo maok, Moseso kor sérrá, “Ono apápa waeriaka kour me woukoupa wae nampon.” Aeno yumo oukoumwan am nkea yae pap mwanap ankank wonae fik tukup mo napono.^c

22 Mono. Yumo te waeman yiki yak konámp Kwaromp taun tokwae faonkwe Saion mek yakáp nap te, am te faonkwe Jerusalem yámar mek yak námpon. Yumo te waeman fopwakwap fopwakwap ensel koupoukarrá warákárrá yakáp nap mek korop napon.^d 23 Yumo te waeman Kwarén loturá warákár konap aropao koupoukour konap mek korop napon. Kwaro am fárákapan sérrá, “Yumo ponankor onomp nae-tárápunono.”^e Kwaro waeman am fárákapamp e wae Buk fek kukumwianámp, yámar mek tank námpon. Yumo koropea Kwaromp wonae fik yakáp napono. Mao te nomwan ponankor taokeyaknámp Jas tokwae karonu. Yumo te manénkir yakápap yae-párák kare aropamp waempomp wonae fik korop napono. Kwaro am fárákapan fwapokwap nánko, yae-párák kare yakáp napon.^f 24 Aeaka yumo te Jisasnámpok korop napono. Mao Kwaro érékép naenámpria amore mek yakria kontrak wourékam térenámp aropono. Tá maomp yiriran kor yumwantá sirrárrá, am kontrakan pwi pap námp támao kor yak námmp mek korop napon. Abelomp yiri kwarákareaka sérrá, “Ken te nopok sumpwiano.”

^b 12:17 Stt 27:32-40 ^c 12:18-20 Kis 19:12-13,16-20; 20:18-21 ^d 12:22 Yé 5:11; 21:2

^e 12:23 ‘Nae-táráp’rá sénámp te, arop ankárankamp tárápu anánk, yinink, arakerápao, náráp ankank pipirikiria nánae-tárápuan ankákárank mwaek nénkria, nae-tárápan náráp nae-tárápara, anánk mwaek sánk konámpono. Nae-táráp te manénkir mekia akwaprá nánaeounápén éréképea, poukwapá akwap konámpon. Nomo Kristen te Kwaro nke námp fek e kwapweráp nae-táráp niampara, nomo fwap Kwaro nánapitenámp kokwapwe kare ankank ti mwanámpon. 1:6 ntia 12:16 fek kor nkeae. ^f 12:23 Lu 10:20

Aeno Jisasomp yirirao kwarákari námpao oukoumwan sérrá yakrá, “Ono yumwan Kwaronámpok éréképea pok nampono.” Aeránko maok, Jisasomp yiriramp karao Abelomp yiriramp karan kámákarea kwapwe kare námpono.^g

Nomo ankár fwapia mér mwanámp kar

²⁵Yumo te mér kipo: Takria yumo oukoumwan sénámp aropamp kar má woupwi kákari yakáprá Kwaromp kar wa mo mwanape. Wokwaek kar má apár mek Kwaro kárákáre kor kare kar koumteouráp aropan sérimpan maok, am kar kwe-pwarará yakápiapon. Am ke fek te kwatae ninik fek yakápap fekamp touwe te kwe-pwarará pirikimprá wouroukoup mwarap pourou moimpon. Aeno oukoumwan te Kwar yámar mek yakria nomwan kárákáre kor kar sáp námpon. Táte nomo man younkwe sánkria te, nomo kwatae ninikamp touwe te fwap wouroukoup mwanámp nie? Mo karonó.^h ²⁶Wokwaek kar Kwaro séránko apár má némp yururimpon. Aeno oukoumwan te mao wae nomwan arakrá séritenámpon: “Ono warko ankwap por má apár sámpea wouwiria maok, yámar meran kor mént sámpá wouwi nanampon.”ⁱ ²⁷Mámá kar warko ‘Ankwap por’rá sénámp te nomwan sérrá: Kwaro wokwaek yoroimp ankankan oukoumwan sámpá wouwi nánko, am ankank te warko yak mono, tirá épér naenámpon. Aeno tak mo nánko te am ankank fwap yak naenámpon.

²⁸Nomo Kwaro náráp firáp arop taokeyaknám némp sámp nám te, am némp wouwi mo, fwaponó. Nomo te am táman Kwarén ‘Aesio’rá séria maok, ankár mao takenkria warákárnám ninikaok man loturia maok, nomo ankár maomp eran saráp sakapria man apápria, maomp yae ankore mek yakáp mwanámpono. ²⁹Am te apae riteanápe, nomp Kwar Tokwae te yaomwi tokwaerao ankank ponankor wouroukoump i konám niamp takenó.^j

Nomo ankár nonopok nounouroup mwanámp kar

13 ¹Yumo Kristen te Kápae kare por yumo ankákárank ankár nonopok nounouroup kipo.^k ²Yumo te panekamp arop yiráp nap mek korop napo, kwaporok nke pwar kwapon, ankár man koropenkria yaewour kip. Yumo te waeman mér napon: Wokwaek kar arop ankwap fárákapao takria maok, ensel ankwap fákáre náráp nap mek koropap yaewouria maok, am enselén te mér mo, aropao korop napan mpwe yonkwaeapon.^l

³Yumo te Kristen fárákap kalabus mek yakáp napan kor, ankár yumo énéнки kalabus mek yakápnáp ninik niamp taknám ninikrá aropomp

g 12:24 Hi 8:6; Stt 4:10 h 12:25 Hi 2:1-3; 10:28-29 i 12:26 Kis 19:18 j 12:29 Lo 4:24
k 13:1 Jo 13:34 l 13:2 Stt 18:1-8; Ro 12:13; 1 Pi 4:9

kipo. Tá arop ankwap fárakapao pouroukamp touwe sámp napan kor, yumo kuri tak mwanapan naponono man ninikrá aropomp kip.^m

⁴Yupu sámp konap ninik te kwapwe karenono. Yumo ponankor yupu sámpria te, Kwaro nke námp fek yiki kare ninik fek yakáp kip. Koumteouráp arop kokoporrá paokoprá, ankwapamp yupu, ankwapamp poumaropan kor kokopor i konap te, am taknap arop fákáreran Kwaro am fek táman nopok touwe tokwae kwatae sánk naenámpon.

⁵Yumo te maniantá kikiank i konap ninikaok paokopi kwaponono. Yumo ankank sámpria te, máte fwap, wae támaonoria warákár kipo. Nomo ankank mo námp kwamp kor, Kwaro wokwae sérimp kar ankár niki-samp mwanámpon: ‘Ono te amwan kwaporok pwar mo. Ono te amwan younkwe sir mo kareno’rá sérimpon.’ⁿ ⁶Aerá sénámpara, nomo fwap ninik kárakáre sámpea yakáprá, arakrá sér mwanámpon:

“Tokwae Kar te onan fwap yaewour i konámpara, ono te apáp mono.
Arop te onan apae mwanapanápe, fwaponono.”^o

‘Nomo Jisasoinámpaok mwanámp te pwarápaek kwaponono’rá sénámp kar

⁷Yumo te ankár yumwan taokeyakápap aropao yumwan Kwaromp kar farákápap aran ninik kipo. Am fárakapamp paokop aran ninikria maok, tá mao méria paokopap ninikaok paokop kip.

⁸Jisas Kraisonsomp ninikaok kuri ankár ankárankamp pourouráp ninik támao yipírman yak, oukoumwan kor ankár támao yakria, tá ankár am fek saráp yaká yak konámpon.^p ⁹Aenámpara, arop ankwap fárakapao farákápap nap mwar pourouráp nkwakwe make kar yiráp woupwi mek korop nánko, yumo Kwaromp mwae kwapwe pwar mwanape. Nomp ninik te Kwaromp aropompan ninik nánko maok, am támao kwapwe kare ara, nomwan kárakáre sámp naenámpon. Aeno nomo te nkwakwe make fir fépér i konap lo karan sámp nánko, am támao nomp ninik mek kárakáre sámp mono. Am ninik te arop am loaok paokop napo, man yaewour moimpon.^q

Kwaro warákár konámp ofaran sénámp kar

¹⁰Nomo te wae nomp alta yak námpan maok, Pris fákárerano sel fekamp lotu nap mek téreap te, am alta fekamp fir sámpea fár mwanap pourou mono. ¹¹Pris Tokwae te sipsip ntiaka bulmakauramp yiri táman saráp sámpea Yiki Kor Kare Aokore mek sámpá youmpea kwatae ninik tirá épér naenámp ofa sánk konámpon. Aeno am fir kare te santukupea ek yaomwi mek yankap konapon.^r ¹²Aeapara, Jisas kor taun younkwek touwe

^m 13:3 Mt 25:36 ⁿ 13:5 Jos 1:5; 1 Ti 6:8-10 ^o 13:6 Sng 118:6 ^p 13:8 Yé 1:17-18
^q 13:9 Ro 14:17; 1 Ko 8:8 ^r 13:11 Wkp 16:27

sámpea sumpwimp te námokuráp yiri fek arop fwapokwapianánko, yiki kukur yakáp napon.^s ¹³Aempara, nomo kuri némp yarápae fek maonámpok tukupea maoui námprámp pwarápae sámp mwanámp.^t ¹⁴Nomo te wae mér námpon: Apárok mapek te taun ankáránk yaká yak naenámp te yak mono. Aeno nomo te wakmwaek korop naerianámp taunan nke mwaria yépék námpon.^u ¹⁵Aenámpara, Jisasoimp ofa méntér ninikrá, nomo Kwarén warákár saráp yakáp mwanámp. Nomo Kwarén ‘Amo te Tokwae Karono’rá sénámp kar, tá warákárnámp kar, am te nomp ofa támaono.’^v ¹⁶Yumo te arop ankwapan yaewour mwanap ninik te pwar kwapono. Yumo te arop ankank mo námpan yaewouria ofanámp ankwapmwaek sánk kipo. Am taknap ofa te Kwaro warákár tokwae konámpono.^w

¹⁷Yiráp yumwan taokeyakáp konap arop fárákap te yumwan yaewourria kápae kare por yumwan taokeyakáp konapon. Tá nánkár wakmwaek am fárákap námoku térenap kar ponankor Kwarén sér mwarea napon. Ae mwarea napara, yumo te ankár am fárákapamp karwaokria maomp yae ankore mek yakáp kipo. Yumo tak napo maok, am fárákap warákárrá téteria ninik kápae sámp mo mwanapon.^x

‘Kwarén kar toropwap kip’rá sénámp kar

¹⁸Yumo te Kwarén yinan yaewour naenámp kar toropwap kipo. Yinomp ninik te Kwaro nke námp fek yae-párák kare námprá ninik námpara, ankár takrá yae-párák kare ninik fek saráp paokop mwarianámp. ¹⁹Onomp ninik tokwae te yumo Kwarén sénapo, onan yaewour nánko, ono warko koupour yumonapok arákárrá korop nanampon.^y

²⁰⁻²¹Kwar te yonkwae porokwe fi korara, am ankár yaká yak naenámp kontrakamp yiri fek te, mao te nomp Tokwae Kar Jisasén fárámpea papámpon. Jisas te sipsip taokeyaknámp Arop Tokwae-nono. Ono ninik namp te, mao yumwan kwapwe kare ninik ponankor sánk nánko, yumo fwap maomp ninikaok saráp paokop mwanapon. Aenapo maok, táte Jisas Kraisomp tére fek nomp ninik mek námoku warákárnámp ninikaok paokop mwanámp sápanoria nampon. Tá nomo ponankor man kápae kare por e tokwae sánk saráp yakáp mwaro. Kare tak mwaro!^z ^a

Pwarnámp kar

²²Onomp ankwapyae fákáre, ono yumwan kar tae fek sénamp te, yiráp ninik mek kárákáre sánkria sénamp kar má fwapia woupwi pátea wa kip.

^s 13:12 Jo 19:17 ^t 13:13 1 Pi 4:1-4 ^u 13:14 Hi 11:16 ^v 13:15 Sng 50:14,23

^w 13:16 Fl 4:18 ^x 13:17 1 Te 5:12 ^y 13:19 Ro 15:30 ^z 13:20 Jo 10:11,18; 1 Te 5:23

^a 13:21 Fl 2:13; 1 Pi 5:10

Ono yiráp por kumwinamp pas má tokwaeri kar mono. ²³Ono te yumwan arakrá sénampon: Nomp nánae Timoti te wokwaek kalabus mekampan pwarari napara, warko kalabus mek yak mono. Mao ononampok koupour koropeanánko te, yino énékér koropea yumwan nke nenempon.

²⁴Yino ‘Gude’rá sénámp má yumwan taokeyakáp konap aróp ponankor séria maok, Kwaromp aróp fákáre ponankoran kor sér kip. Tá apár Itali mekamp Kristen fákáreao kor yumwan ‘Gude’rá sénapon.

²⁵Ono ninik namp te, Kwaro námokuráp ninik fek yumwan ponankor ninikia yaewouranoria nampon.